

KU YA EHANDLE KA MUXAXA



A hi yimiseni xisweswo xinkadyana nyana.

Xikwembu lexi rhandzekaka, ha khensa swinene eka Wena hikwalaho ka nkateko lowu nakambe wa ku yima endlwini ya Xikwembu na ku gandzela Xikwembu lexi hanyaka. Hi khensa swinene kuva ha ha nyikiwile nkateko lowu emisaveni. Nakona sweswi hi khensa ngopfu hikwalaho ka vanhu lava va tshembhekaka, na vonavu, Hosi, lava va humaka eka timayili totala, madzana ya timayili, votala va vona. Na swona van'wana va vona va ta ringeta ku—ku vhutha ndlela ya vona yo tlhelela endzhaku, vusiku lebyi, ku rhelela hi magondzo lamakulu, ku tsemakanya magondzo lamakulu. Xikwembu, ndza khongela leswaku U tava na vona na ku va pfuna. Va fambisi, O Tatana. Ha Ku khensa hikwalaho ka switsutsuxu leswi swa mpfula leswi nga hi titimetela moya, xinkadyana.

² Kutani, Tatana, ha khongela leswaku U ta hlangana na hina vusiku lebyi eRitweni ra Wena. Hikuva, hi xona xivangelo xova hi hlengeletanile, Hosi, i ku hlangana na Wena eRitweni. Hi pfune, Hosi, leswaku ku hlengeletana ka hina ku tava loku ku vuyerisaka eka Mfumo wa Wena, na leswaku hi tava lava pfunekike, leswaku hi ta pfuna van'wana. Hi nyike swilo leswi hi swi kombelaka, hi Vito ra Yesu. Amen.

Mi nga tshama ehansi.

³ Kuva ntsena na vukonanisi byintsongo bya xihundla le ndzeni. Kutani loko nhlengeletano yi nga se sungula, Billy u ndzi nyikile e—e ndzhwalo wa byona kukondza ndzi—ndzi nga ha swi tivi leswaku ndzi fanele ku sungula kwihi. Kambe hi le ku khongeleni leswaku—leswaku Xikwembu xi mi katekisa hikwalaho ka matshalatshala ya n'wina ya kuva mi salerile xikhongelo xa ni madyambu.

⁴ Sweswi, loko Xikwembu xi swi rhandza, mixo wa Sonto lowu taka ndzi tava ndzi ri na e—e xikhongelo nakambe. Ndza ha ku vulavula na mufundhis, nakona swi lulamile eka vona.

⁵ Kutani sweswi ndzi navela kuva ndzi ri na nkarhi wa ku tivisa munghana un'wana na un'wana loyi ndzi nga na yena lahwani, kambe ndza swi tiva leswaku mi rindzerile. Ka hisa. Swingaleswi ndzi—ndzi ta tsema nkarhi walowo, na—na ku vula leswaku, “Xikwembu a xi mi katekisi.”

⁶ Ma swi tiva, a ndzi swi tivi loko ku ngava kuri na nchumu lowukulu lowu mani na mani a nga wu kombelaka eka mina, ku tlula ku vula leswaku, “Xikwembu a xi ku katekisi.” Wa vona? Loko Xi nga endla sweswo, sweswo hi leswi ndzi swi lavaka, ntsena—ntsena sweswo. Ndzi ehleketa leswaku rero i rito

ri kulukumba swinene eka—eka ririm i rin'wana, "Xikwembu a xi ku katekisi." Kutani, sweswi, nakona ndza swi tiva leswaku Xa swi endla.

⁷ Na swona tani hilaha ndzi byeleke nsati ku ngari khale ngopfu. A ndzi—a ndzi ringeta ku hlämba, nakona a ndzi nga koti ku oma. A ndzi—a ndzi ta tisula, kutani ndzi tlhela ndzi tsakama nakambe. A ndzi ta tisula, kambe ndzi nga swi koti ku ambala hembhe ya mina, hambi swiri tano. Nakona swa hambana nyana le handle eTucson. Ku hisa ku hundza laha hi kambirhi, kambe u va—u va u nga hari na nyuku na swintsongo. Ku hava—ku hava ndzhongho emoyeni, swingaleswi wa oma loko wa ha ku humela ehandle. Loko u veka ndhichi ya mati lahaya, kutani ya famba. U ngaka u nga juluki, hikuva ri wu tekela ekule na wena u nga se—u—u nga se juluka. Wa juluka, hi swona, kambe u nge tshuki u wu vonile. Swingaleswi, lahawani, a ndzi ringeta kuva na nkarhi wo tika hi ku tisula. Swingaleswi, kutani ndzi—ndzi le ku tsakameni sweswi.

⁸ A ndzi tlhelerile le ekamareni, nakona a hi ri na nkombo kumbe nhungu wa vanhu le ndzeni, lava a vari va xirindza-mhangu, nakona a va fanele ku voniwa hi nkarhi walowo.

⁹ Sweswi, xivangelo xova ndzi lava leswaku mi tshama, na ku mi kombela kuva mi—mi ta, swi hikwalaho kova ndzi—ndzi swi twa swi ri—swi ri leswi swi vuyerisaka eka hina. A ndzi—a ndzi nga ta swi endla sweswo, vanghana. Ndzi—ndzi ehleketa swotala hi n'wina, ku endla sweswo, ntsena ku ta mi ta—ta twa munhu un'wana, kumbe ku yingisela leswi ndzi faneleke ku swi vula, kumbe swin'wana. Ndzi—ndzi ngaka ndzi nga swi endli sweswo. Sweswo a swi nga tava swi ri kahle. A swi ngata kombisa rirhandzu ra mina eka n'wina, ntsena ku ta hi ndlela yaleyo. Nakona a ndzi pfumeli leswaku mi ta...Hambi leswi, ndzi swi tivaka leswaku ma ndzi rhandza, kukotisa leswi ndzi mi rhandzisaka xiswona. Kutani—kutani ndza—ndza—ndza swi tiva leswaku, kumbe a mi nga ta swi endla leswi mi swi endlaka. Swingaleswi ndzi ehleketa swo enela hi n'wina, leswaku a ndzi nga ta mi tshamisa laha ku hisaka na swin'wana, kukotisa leswi, loko kuruku a ndzi nga ehleketa leswaku i swilo leswi nga ta pfuna n'wina.

¹⁰ Kutani, loko ndzi nga se ta lahawani, ndzi tshamela ro ringeta hi matimba, emahlweni ka Xikwembu, ku tlakula nchumu lowuntsongo, Matsalwa ya mukhuva wokarhi, kutani ndzi kombela vuleteeri bya Xona, nchumu wo hetelela loko ndzi nga se suka. "Pfuna, Hosi Xikwembu, hi mukhuva wun'wana, nyikela—nyikela hinkwaswo leswi U nga swi kotaka eka vanhu lava rhandzekaka."

Na swona ndza langutela, na ku pfumela, leswaku ndzi ta tshama na wena hi masiku. Ndzi pfumela leswaku ley i ndhawu yo koma ku tlurisa ley i nga na yona, loko ha ha yima swin'we

kukotisa leswi. Hi tava swin'we hi laha ku nga Heriki. Wa vona? Ndzi endla sweswo. Ndzi—ndzi—ndzi pfumela sweswo.

Na swona ndzi lava ku mi pfuna. Kutani mina, loko ndzi vula swin'wana leswi hoxekeke, Tatana wa le Tilweni wa swi tiva leswaku a hi mhaka yo va ndzi tibyerile ku swi endla; swi hikuva ndzi swi endla ndzi ngari eku swi tiveni; ndzi tava ndzi swi endla hi ku pfumala vutivi.

¹¹ Hikokwalaho, hi ku tiva leswaku mi vutihlamuleri bya mina, na kuva emavokweni ya mina, hikwalaho ka Evhangeli, ndzi tshamela ku lava ku mi hlayisa emaphejini ya Bibebe leyi. Kutani—kutani ndzi . . .

Minkarhi yo tala vanhu va tile eka mina, kutani va ku, “Makwerhu Branham, loko ntsena u nga huma lahwani kutani u ku ‘LESWI HOSI YI SWI VULAKA’ eka xiilangi xa mina lexi vabyaka, xi ta hola. Yana le handle kutani ntsena u ku, ‘Xi ta hola.’ Sweswo ntsena hi leswi ndzi lavaka leswaku u swi endla.”

¹² Sweswi, sweswo hi leswi tshembhekeke na ku rhandzeka. Hilaha ndzi swi khensaka hakona! Kambe, ma swi tiva, ndzi ngaka ndzi nga swi endli sweswo kukondza Yi ndzi byela, ku sungula. Wa vona? Ndzi nga ha khongelela n'wana, ndzi endla hinkwaswo leswi ndzi nga swi kotaka.

Kambe, ma swi vona, loko kuruku a ndzi yile kwalahaya hi vuhibeki ivi ndzi swi vula ke? Wa vona, loko a ndzi te, “LESWI HOSI YI SWI VULAKA,” a swi tava ntsena swi ri vuhibeki bya mina. Wa vona? Wa vona? Kutani swi nga humelela, nakona swi nga ha tsandzeka. Kambe, kutani, loko kuruku munhu yaloye u le hansi ka vuhibeki bya mina, nakona swi nga humelangka ke? Kutani, munhu yaloye a nga hava eka e—e xiyimo nkarhi wun'wana exikarhi ka vutomi na rifu, kutani ntshembho wa yena wu tava kwihixana? A nga ha chava leswaku ndzi ngava ndzi ri ehansi ka vuhibeki nakambe. Wa vona?

Swingaleswi, loko ndzi swi vula, ndzi lava ku tiyisisa leswaku swi lulamile, hi hinkwaswo leswi ndzi swi tivaka. Kutani loko Yi vulavula na mina, ndzi ta vula ntsena leswi Yi ndzi kombeke swona. Hambi swi kahle kumbe swi bihile, ndzi fanele ku swi vula. Nakona nkarhi wun'wana a swi—a swi tsakisi ku byela vanhu swilo sweswo. Kambe, hambi swiri tano, ndzi loyi a bohiwaka hi ntirho ku byela vanhu leswo—leswo biha leswi nga ta va wela, tani hilaha ndzi bohiwaka hi ntirho ku va byela swilo leswinene leswi nga ta va wela.

¹³ Nakona, endzhaku ka swona hinkwaswo, hi lava ku rhandza ka Hosi. Nkarhi wun'wana ku rhandza ka Hosi ku hambanile na ku navela ka hina. Kambe, hambi swiri tano, loko hi lava ku rhandza ka Hosi, ntsena swi hlawulekile tani hi ku tiva leswaku leswo biha swi ta hi wela, loko kuri ku rhandza ka Hosi. Hambi swiri leswinene kumbe leswo biha, i ku rhandza ka Hosi loku

hi lavaka leswaku kuva ku endliwile. Na swona ndza swi tiva leswaku hi swi langutisa hi mukhuva walowo.

¹⁴ Sweswi, ndza—ndza swi tiva leswaku vamakwerhu lahawani hi ntolovelva va na makume nharhu wa timinetse, makume mbirhi kuya eka makume nharhu wa timinetse ta hungu hi vusiku bya Sonto. Nakona a ndzi—ndzi swi tivi loko ndzi ta swi kota sweswo kumbe ee, swingaleswi ndzi—ndzi ta ringeta hilaha ndzi nga ta kota hakona.

¹⁵ Sweswi, ndzi ehleketa leswaku kuna ntirho wo khuvula xikan'we-kan'we endzhaku ka lowu. Ndzi swi twile leswaku va khuvurile ntlawa lowukulu wa vanhu mixo lowu. Nkarhi hinkwawo, ku na nkhuvulo lowu yaka emahlweni lahawani, nkarhi hinkwawo. Vaministara, Mamethodist, Mabaptist, Mapresbyterian, church of God, Lutheran, hambi ku ngava yihi, va le ku teni va ta khuvuriwa hi Vito ra "Hosi Yesu Kreste."

Kutani emahlweni ka Xikwembu, loko ndzi fanele ku yima eTafuleni ro Avanyisa, ndzi ta fanelka tihlamulela eka sweswo. Nakona loko kuruku a ndzi ri erivaleni emiehlekeweni ya mina, hikuva ndzi lulamisiwa eka hinkwaswo swa vutomi bya mina tani hilaha ndzi nga xiswona eka sweswo, a ndzi tava ndzi lulamerile Ntlhandluko kona sweswi, hikuva ndza swi tiva sweswo i Ntiyiso wa Evhangeli. Wa vona? Walowo i Ntiyiso.

¹⁶ Ku hava ndhawu Tsalwa na rin'we eBibeleni laha un'wana a nga tshama a khuvuriwa hi ndlela yin'wana handle ka Vito ra Yesu Kreste. Xileriso xa "Tatana, N'wana, na Moya lowo Kwetsima," kova ntsena... "Yanani hakona, mi ya dyondzisa vamatiko hinkwawo, mi va khuvula hi Vito ra Tatana, N'wana, Moya lowo Kwetsima." Ku ngari hi...ku ngari ku vitanela xiyimela vito lexi ehenhla ka vona; kambe ku va khuvula hi Vito ra Tatana, N'wana, Moya lowo Kwetsima, leswi nga "Hosi Yesu Kreste."

¹⁷ Un'wana na un'wana eBibeleni u khuvuriwile hi Vito ra Yesu Kreste. Nakona Bibele yi vurile, leswaku, "Mani na mani loyi a nga ta hunguta Rito rin'we eka Yona, kumbe ku engetela rito rin'we eka Yona, hi ndlela yihi kumbe yihi, khombo eka vona." Swingaleswi ndzi na swo enela leswi ndzi faneleke ku chava mayelana na swona, handle ka ku engetela swin'wana kumbe ku Swi hunguta ku suka eMatsalweni.

Swi ndzi nghenisile ekhombyeni nkarhi wotala, kambe ndzi tshama kwalahaya. Hi yena vuhikelo bya mina. Swi ndzi endlile leswaku ndzi hambana na vanghana lavo tala. Va hambanile na mina hikwalaho ka sweswo. Kambe ntsena loko ndza ha hlayisa Munghana loyi lahawani, Hosi Yesu! Na swona hi Yena Rito. Hambi loko, ndlela yi nga tlhuma, ndlela yi nonoha, U ta hi ndlela leyi fanaka. "Kutani loko va vurile N'winyi wa yindlu 'Beelzebub,' vadyondzisiwa va Yena a va nga ta vuriwa leswo tlurisa xana?"

¹⁸ Sweswi Hosi a yi ve na n'wina na ku mi katekisa kwala vhikini, na ku mi nyika swo tlurisa leswi ndzi nga swi khongelalaka kuva Xikwembu xi mi nyika swona, i xikhongelo xa mina.

Sweswi hi ya eku hlayeni eRitweni lero hlawuleka.

¹⁹ Kutani—kutani sweswi tsundzukani, nakambe, vusiku bya Ravunharhu... Xana xi kona xikhongelo xa le xikarhi ka vhiki kumbe swin'wana? [Makwerhu Neville a ku, "Ravumbirhi, xikhongelo xa vanhu vantsongo, hi vusiku bya Musumbhunuku na Ravumbirhi."—Muhleri.] Vusiku bya Musumbhunuku na Ravumbirhi i xikhongelo xa vanhu va ntsongo. Ndza tshembha leswaku vanhu va swi tiva.

²⁰ Makwerhu Junior Jackson, xana u kona kwala muakwini? Ndzi... Makwerhu Jackson, a ndzi... [Makwerhu Neville a ku, "Ina, u lahayaya."—Muhleri.] U kona, Makwerhu Jackson. Hi swona. Ndzi—ndzi... Makwerhu Jackson un'wana lahayani, ndzi...

Na Makwerhu Don Ruddell, xana u kona kwala muakwini vusiku lebyi xana? Makwerhu Don, lahayani.

Na vamakwerhu lavan'wana votala, ndzi vona vamakwerhu lahayani ku suka e Arkansas, na le Louisiana, na—na tindhawu to hambana-hambana ku rhendzeleka na tiko.

²¹ Kutani ndzi na van'wana, vamakwerhu lava dyuhaleke lahayani vusiku lebyi, na vonavu. Ndzi na Makwerhu Thomas Kidd loyi a tshameke lahayani kuya exineneni, u tava na makume nhungu-mune wa malembe hi vukhale eka masiku mantsongo. Nakona kwalomu ka nharhu kumbe mune wa malembe lawa ya hundzeke, u endliwile vuhandzuri hikwalaho ka xiphiqo xa vununa, na swona a ri ekufeni hi mfukuzani. Dokodela a ha ku n'wi lata leswaku a tifela. Kutani ndzi tsakerile ku onha movha wa mina wa khale, hi kuya eka yena, le henhla eOhio. Nakona Hosi Yesu u n'wi horisile a hanya na kuva kahle. Kutani hi loyi, yena na muringani wa yena lontsongo, vusiku lebyi. Na swona votala va n'wina ma va tiva; kumbexani van'wana a va va tivi. Kambe hi lava wanuna na wansati lava va chumayeleke Evhangeli loko ndzi nga se tswariwa. Ehleketa ni ha sweswo, nakona ndzi mukhalabya. Wa vona? Sweswi, kutani ndza va langutisa, nakona va haya emahlweni, kutani ndzi kuma xitiya nhlana.

Hinkwerhu ka hina ha n'wi tiva Makwerhu Bill Dauch loyi a tshameke lahayani eyinhleni.

²² Kutani, oho, hilaha hi khensaka hakona eka minkateko leyikulu hinkwayo ya Xikwembu! Ingaku yi ngaya emahlweni yi va na hina ku kondza nanga liya yi yimba, ma swi tiva, "Hi ta vutleriwa ehenhla swin'we, ku ya hlangana na Hosi empfhukeni." Ehleketa ni ha swona! Vanhu lava lahlekeke, a va

nga ha mi voni na swintsongo, kambe mi hlangana kun'we na ntlawa hinkwawo.

"Lava va hanyaka na ku salela ku Vuya ka Hosi va ngaka va nga tshimbisi, kumbe ku sivela," rito ra kona i, "lava va etteleke," ku ngari lava feke. Ee, Vakreste a va fi. Vo wisa nyana, wa vona. Hi sweswo ntsena. Oho, mina! "Mhalamhala ya Xikwembu yi ta yimba; kutani lava feleke ka Kreste va ta sungula va pfuka," va humelela eka votala. Kutani xikan'we-kan'we, loko ma ha yimile mi langutisa, ivi, kunene, boti hi luya, nakona ma swi tiva leswaku a ka hari khale. Hi timinetse tintsongo, "Hi ta hundzuka, hi xinkadyana, hi ku copeta ka tihlo. Kutani swin'we na vona, hi tava hi ngari kona emisaveni, hi vutliwile kuya hlangana na Hosi empfhukeni."

²³ Kutani, ku ehleketa, hi hinkwaswo leswi hi swi voneke eMatsalweni, na switiyisiso leswi vekiweke erivaleni swa awara leyi hi hanyaka eka yona, swi nga ha humelela ku nga se hela na ntirho lowu, ntsena ehleketani hi swona, vusiku lebyi.

Kutani, hi sweswo, hi kongoma Rito ra Xona, loko hi ri karhi hi phendla eka Vaheveru ku avanyisa ka vu13, na swona hi ya eku hlayeni ku suka eka ndzimana ya vu10 ku fika eka ya vu14. Eka Vaheveru 10 na... kumbe, kumbe ndzi khomeleni. Vaheveru 13:10 ku fika eka 14.

²⁴ Sweswi, tani hilaha ndzi vuleke, hina, loko hi hlambanya ku tshembheka eka mujeko wa hina, leswi swi nga kahle, ndzi... Hi minkarhi hinkwayo ha yima loko hi hlambanya ku tshembheka ka hina. Na le ka mintirho yin'wana leyikulu, ha—ha yima hi ku xixima, kumbe ku losa, na swin'wana, eka tiko ra hina. Kutani loko va ri karhi va tlanga *Mujeko Lowu Khavisiweke Hi Nyeleti*, hi yima hi ku thwixi.

²⁵ Kutani tani hi masocha ya Xikreste, a hi yimeni hi ku thwixi loko hi ri karhi hi hlaya Rito ra Xikwembu. Yingiselani swinene eku hlayiweni ka Rito. Xivangelo xova ndzi rhandza ku Ri hlaya; marito ya mina ya nga tsandzeka, kambe ra Xona ri ngaka. Swingaleswi loko ndzi hlaya Rito ra Xona, ntsena, mi ta kateka. Ndzimana ya vu10 ya ku avanyisa ka vu13 ka Vaheveru.

Hi ni altari, laha lava va tirhelaka tabernakele va nga pfumeleriwiki ku dyela ka yona.

Hikuva mintsumbu ya swifuwo, leswi ngati ya swona yi yisiwaka evukwetsimelweni hi muprista lonkulu hikwalaho ka vudyoho, yi hisiwaka ehandle ka mixaxa.

Hikwalaho na yena Yesu, leswaku a kwetsimisa tiko hi ngati ya yena, u fele ehandle ka nyangwa.

A hi humeni hakona hi ya ka yena ehandle ka mixaxa, hi ri karhi hi rhwala tingana ta yena.

Hikuva kwala a hi na muti lowu tiyeke, kambe hi lava lowu nga ta humelela.

²⁶ Hosi Xikwembu, Wena u nga na vutihlamuleri hi Rito leri, na kuva na vutihlamuleri bya ku Ri hlayisa ku rhelela hi tinguva, ku vona leswaku Ri ta eka hina ri ri leri nga hungukiwangiki. Ri tengile, Rito ra Xikwembu leri tengeke. Hi Ri hlayisa swonghasi etimbilwini ta hina enkarhini lowu. Phemeleta tsalwa leri, Hosi, ri va mongo wa tsalwa eka hina, vusiku lebyi; leswaku hina, vana va munhu, hi ta twisisa ku rhandza ka Xikwembu. Hikuva hi swi kombela hi Vito ra Yesu. Amen.

²⁷ Dyondzo ya mina eka—eka madyambu lawa i: *Ku Ya Ehandle Ka Muxaxa*. I dyondzo leyintsongo swinene, leyi nga tolrevelekangiki ngopfu, kambe, ma swi tiva, hi ntoloveloo hi kuma Xikwembu eka swilo leswi nga tolrevelekangiki. Misava yi kumeka yi ri eka nchumu lowu nga tolreveleka, kukondza, xin'wana na xin'wana lexi hambaneke na maendlelo ya ntoloveloo, xi hundzuka lexi nga tolrevelekangiki.

Tani hilaha ndzi chumayeleke lahawani eka masiku nyana lawa ya hundzeke, kwala etabernakeleni, hi: *Munhu Loyi A Nga Twisisekiki*. Kutani n'wamapurasi i munhu loyi a nga twisisekiki eka n'wamabindzu; n'wamabindzu i munhu loyi a nga twisisekiki eka n'wamapurasi. Mukreste i munhu loyi a nga twisisekiki eka mupfu—... loyi a nga pfumeriki, na swin'wana. Utta fanele kuva ximphuta xa wun'wana. Swingaleswi, xin'wana na xin'wana lexi nga tolrevelekangiki, xi ku endla u va tani hi ximphuta, eka e—e maendlelo ya ntoloveloo.

²⁸ Kutani hikokwalaho, vanhu va Xikwembu, na vaprofeta va Xona, na varhumiya va Xona—Xona ku hundza hi nguva, lava a va rhwele Hungu ra Xona ku suka eRitweni, a va tekiwa tani hi swimphuta, hi va le handle.

²⁹ Nowa a ri ximphuta, eka misava leyikulu ya vutlharhi leyi a yi chumayelela. Nowa... Hakunene a ri ximphuta, eka Faro; na nenge wa yena exilovelweni kutani a wu tshika, hikwalaho ka vapfuvi va ridaka, tani hilaha a va ehleketa hakona. Nakona Yesu a ri ximphuta, eka vanhu. Na hinkwavo lava va tirheke na ku hanyela Xikwembu, va tekiwile tani hi swimphuta. A va fanele ku ya ehandle ka mixaxa leyi a vari na yona.

³⁰ Kotala na kotala, ndzi endliwa leswaku ndzi pfumela leswaku vanhu a va le ku fikeni eka Kreste.

Sweswi, ndzi lahawani ku ta ringeta hi ndlela yin'wana na yin'wana leyi ndzi nga yi kotaka, na ku endla xitatimente xa mina xi va erivaleni hilaha ndzi swi kotaka hakona. Kutani mi xaniseka na mina loko mi swi kota.

³¹ Loko ndzi ri karhi ndzi languta na ku chumayela ku tsemakanya hi tiko, kutani ndzi hlalela vanhu, ndzi—ndzi khorwisiwa hi ku hetiseka leswaku vanhu a va le ku fikeni eka Kreste. Nakona ndza tsembha leswaku i nala loyi a hoxeke xirhalanganyi lexi. Hikuva, xivangelo xova ndzi pfumela leswi, a hi Yena xivumbiwa lexi va kongomisiweke eka xona. Va ngava va

kongomisiwile eka e—e—e mikhuva, kumbe dyondzo ya kereke, kumbe nkhuvu, kumbe ntokoto, kumbe nyanyuko, kumbe swin'wana swo tani hi sweswo, ematshan'wini yo kongomisiwa eka Kreste, a nga Rito.

Hikokwalaho ndzi ehleketa leswaku vanhu va vekile vuyo bya vona hilaha ku nga Heriki ehenhla ka dyondzo yo karhi ya kereke, kumbe vutitwi byin'wana. Tani hilaha, van'wana va nge, "Ndzi cinile ndzi ri eMoyeni. Ndzi—ndzi vulavurile hi tindzimi. Ndzi—ndzi—ndzi twile ndzilo wu tsutsuma ehenhla ka mina." Kutani ma swi tiva xana, kuri swilo sweswo hinkwaswo swi nga ha encenetyiwa hi javulosi ke?

³² Ku na nchumu wun'we ntsena lowu a nga taka a nga wu encenetyi, rero i Rito. Eka nkanerisano, wa yena na Yesu, nkarhi wun'wana na wun'wana Yesu a n'wi hlula. "Ku tsariwile," Rito!

Kutani ndza pfumela, namunthla, leswaku xivangelo xova vanhu va ngari ekuteni eka Kreste, i kuva va kongomisiwile, votala va vona, eka e—e—e dinominexini. "Tana u ta joyina kereke ya hina." Kumbe, "Hlaya nonganoko wa hina wa swivutiso na tinhlamulo," kumbe, "Pfumela dyondzo ya hina," kumbe—kumbe maendlele ya muxaka wokarhi. Va kongomisiwile endleleni yo hoxeka. Na swona swendlo swa vona na vutomi lebyi va byi hanyaka handle ka Kreste, swi khorwisa hi vutomi bya vona, leswaku swi tiyisisiwile hi nchumu lowu fanaka.

³³ Xikombiso. A ndzi lavi ku vavisa matitwele ya munhu un'wana. Kambe, endzhaku na le mahlweni, ku tsemakanya tiko, ndzi sorile vavasati lava ambaleke misisi yo koma. Yaleyo i Bibebe. Ndzi sorile vavasati lava ambaleke leswo koma, lava tirhisaka swo tipenda. Nakona lembe rin'wana na rin'wana swi ya swi nyanya. Swi kombisa leswaku ku na rintiho rin'wana, kun'wanyana, leri ri va kombaka ndlela yin'wana. Na swona a va le ku hundzeleni eka Kreste.

³⁴ Kutani va ri, "Hi nghena kereke. Kereke ya hina a yi . . ." A swi endli ku hambana leswi kereke ya n'wina yi swi pfumelaka.

Xikwembu xi te, "Swi hoxekile." Kutani loko kuruku a va fikile eka Kreste, a va ta yima ku endla sweswo. Nakona, ku ngari sweswo ntsena, kambe wanuna a ta teka ndhawu ya yena loko a fikile eka Kreste, kutani a lwisana na sweswo. Vavanuna a va nga ta pfumelala vavasati va vona va tikhomisa xisweswo. Wanuna wa xiviri a nga swi lavi kuva nsati wa yena a tikhoma hi ndlela yaleyo.

³⁵ Nakulorhi lontsongo lahawani edorobeni, siku rin'wana, a lavile ku dlaya vafana vambirhi. A vari endhawini yin'wana laha ku cheriwaka mafurha kona. N'wina vanhu va le Jeffersonville mi swi vonile ephepheni. Kutani nhwanyana loyi lontsongo u tsutsumerile endhawini leyi ku cheriwaka mafurha kona, a nga ambalanga, na nchumu, na swintsongo, ivi vafana lavaya va

mbirhi a va tshamile lahaya va vula swin'wana. Kutani mutirhi u lavile ku dlaya vafana lavaya vambirhi; nakona u khomiwile hikwalaho ka swona, ivi a yisiwa ekphoto. Kutani muavanyisi u n'wi vutisile, "Hikokwalaho ka yini u...nhwanyana u ambarise xileswi?"

A ku, "Ndzi ehleketa leswaku u languteka a xongile."

³⁶ Sweswi, ku na swin'wana leswi nga hoxeka hi wanuna luya. A ndzi na mhaka leswaku u...Loko a ri mudyohi, ku na swin'wana leswi hoxekeke hi yena. Rirhandzu ra yena eka wansati luya ri ngaka ri ngavi ra xiviri, na ku n'wi humesela ehandle kuva a va xikwa ya mbyana hi ndlela yaleyo. Ku na leswi nga hoxeka. Xana vavanuna va ngava va fikile eka ku lemuka leswaku va nga avanyisa exikarhi ka leswinene na leswi nga hoxeka?

³⁷ Xana mi kale mi swi vona swiambalo leswintshwa swo hlambela leswi va nga ha ku swi humesa? Xana ma byi tiva vuvhumbhi bya mina leswaku vavasati va ta hetelela va yile eka matluka ya nkuwa, makume nharhu-nharhu wa malembe lawa ya nga hundza? Nakona sweswi va na vona lava ambaleke matluka ya nkuwa, swikete swo vonikela. Rito ra Hosi a ri tsandzeki. Wa vona? Kutani sweswo a swi fanele ku humeleta loko ku nga se fika nkarhi wa makumu, ku ya ematlukeni ya nkuwa nakambe. A ndzi swi hlaya eka magazini wa *Life*. Sweswo swi vurile eka makume nharhu-nharhu wa malembe lawa ya nga hundza, loko vavasati va nga se wa. Ku vuriwile hilaha va nga ta swi endlisa xiswona esikwini leri, na swona hi lava. Hilaha a va ta ambala swiambalo swo fana na swa vavanuna, na hilaha va nga ta... Vuhunguki bya wansati byi ta wela tiko leri.

³⁸ Tiko leri nga ehansi ku tlula matiko hinkwawo lawa yanga kona emisaveni, i Amerika leri. Hi rona leri nga thyaka ku tlurisa entlaweni. Sweswo i kuya hi vuxokoxoko bya tinhlayo. Mpimo wa vukati na ku thalana wu le henhla etikweni leri ku tlula endhawini yin'wana na yin'wana emisaveni, na minxaxameto ya matiko man'wana. A hi tshamela ku xaxameta ku suka eFurwa, vubihi na thyaka ra tiko leriya, kutani sweswi va kuma mambalelo ya vona eka hina. Hi hundzile mindzelekan ya vona.

³⁹ Ndza swi tiva leswaku ku na swivangelo swin'wana kuva vanhu va ngari eku fikeni eka Kreste. Loko a va fika, a va nga ha ta tikhomisa sweswo.

Yesu u xanisekerile ehandle ka minyangwa, leswaku A ta kwetsimisa vanhu va Yena hi Ngati ya Yena N'winyi. Ku *kwetsimisiwa*, ku huma eka rito ra Xigiriki, nhlanganelo, leri vulaka, "ku basisiwa, na ku vekerija ntirho." Nakona loko Xikwembu xi basisa vanhu va Xona hi Ngati ya Yesu, Xi va basisa eka vubihi bya misava na ku va vekela ntirho.

*Hikwalaho na yena Yesu, leswaku a kwetsimisa tiko
hi ngati ya yena, u fele ehandle ka nyangwa.*

⁴⁰ Hambi kuri eka vanhu va Full Gospel, va tlhelerile emikhoveni ya vona yo biha leyi va humaka eka yona. Xana kereke ya Pentekosta a yi ri yini, makume mune kumbe makume ntlhanu wa malembe lawa ya nga hundza? Va rhukanile, na ku rhuketela, na ku sandza tikereke leti va humaka eka tona, tona tidinominexini. Xana va endlile yini? “Kukotisa mbyana loko yi tlhelela emahlanteni ya yona, na nguluve endhopeni.” Va hundzulukerile endhawini yaliya va nga handiwa va suka ka yona, kutani sweswi tikereke ta vona ti thyakile ku fana na letin’wana hinkwato.

⁴¹ A kuri swin’wana, tani hilaha ndzi swi vuleke mixo lowu. Tani hi, vanhu va tani hilaha Petro a vuleke hakona, eka Mukwetsimi—Mukwetsimi Matewu 17:4 ku fika eka 8, laha a nga te, “Swi sasekile kuva kwala. A hi akeni titabernakele tinharhu.”

⁴² Kambe Moya wu va lerisile ku ka va nga swi endlili. Wu te, “Loyi i N’wana wa Mina loyi a randzekaka; N’wi yingiseni,” nakona hi Yena Rito. Hi Loyi hi faneleke ku langutela eka yena, a nga Rito, ku ngari vuhiseki bya hina kumbe swin’wanyana. “Hi yena Rito ra Mina; N’wi yingiseni!” Kutani xana va vonile yini endzhaku ka loko Rito rero ri vulavurile na vona? Hambi kuri Muxe na Eliya a va nga hari kona; na swona a ku ngari na mukhuva; na swona a ku ngari na xin’wana lexi saleke handle ka Yesu ntsena, nakona hi Yena Rito. Hi sweswo ntsena leswi va swi voneke.

Sweswi, “Kuya ehandle ka mixaxa.”

⁴³ Hi kuma leswaku emuxaxeni wa vona laha mhaka leyikulu yi humeleleke kona, le henbla ka Ntshava ya Nkwetsimo, tani hilaha Petro a yi vitaneke hakona, “ntshava yo kwetsima,” laha A hlanganeke na vona. Sweswi, a ndzi pfumeli leswaku muapostola a vula leswaku ntshava a yi kwetsima; a vula leswaku a kuri Xikwembu lexi kwetsimaka ehenbla ka ntshava.

A hi kereke yo kwetsima; a hi vanhu vo kwetsima. I Moya lowo Kwetsima endzeni ka vanhu. Moya lowo Kwetsima wa kwetsima. Hi Wona Mufambisi na Murhangeri wa n’wina.

⁴⁴ Kutani hi kuma leswaku, emuxaxeni lowuntsongo ehenbla ka ntshava, Nkwetsimo, loko va tava va lerisiwile ku yingisa, nchumu wun’we ntsena lowu va lerisiweke ku wu endla a kuri ku yingisa Rito. Nchumu wun’we ntsena lowu va wu voneke, a ku ngari mukhuva. A va vonanga nchumu wun’wanyana handle ka Yesu, nakona hi Yena Rito leri endliemeke nyama.

Hilaha sweswo swi sasekeke hakona, emuxaxeni waluwa a wuri entangeni wa Eden. Loko Xikwembu xi tava xi tiyisile Kereke ya Xona entangeni wa Eden, vanhu va Xona, a vari na khumbi rin’we ro tshama endzhaku ka rona; rero a ri ri Rito. A vari na xitlhangu xin’we, xiambalo xin’we xa vutisirheleri, nchumu wun’we, hikuva Xikwembu a xi tiva lexi nga hlulaka javulosi, na swona rero i Rito.

⁴⁵ Yesu u endlile nchumu wun'we. "I Rito; ku tsariwile." Nakona Sathana u ringetile ku—ku Ri tota, ku ngari ku Ri tshaha; ku N'wi totela Rona. Kutani Yesu u te, "Ku tsariwile nakambe." Sweswi, hi fanele ku tshama na Rito rero!

⁴⁶ Na le muxaxeni lowuntsongo lowu a vari na wona lahaya, wa Petro, Yakob, na Yohana; na Yesu, Muxe, na Eliya. Kutani emuxaxeni wa vona va vonile vandla ra Tilo ra ndzhuti, kumbe Langavi ra Ndzilo ri ri karhi ri lengalenga endzeni ka papa leri kwetsimiseke Hosi Yesu. Kutani loko va lunghekile ku endla dinominexini, yin'we ya nawu, na yin'we ya vaprofeta, na swin'wana, Rito ri ku, "Loyi i N'wana wa Mina loyi a rhandzekaka; N'wi yingiseni." Kutani, eka leswi va lerisiweke swona, a swi fana na leswi a swiri xiswona eEden, "Tshamani na Rito!" Walowo i muxaxa wa Xikwembu eka vanhu va Xona.

⁴⁷ Swi tikomba, namuntlha, kuri siku leri vanhu va nga eku hundzeni emixaxeni. Eka hinkwaswo, va le ku hundzeni.

⁴⁸ Ma swi tiva, ndzi byeriwile, nkarhi wun'wana lowu nga hundza, leswaku va na xihaha-mpfhuka xa jet sweswi lexi nga...xi endla tihuwa leti hi ti twaka lahawani hinkwako, leti ti ninginisaka mafasitere. Hi loko xihaha-mpfhuka xi ri na rivilo swonghasi lero xi hundza mpfumawulo wa xona, lowu vuriwaka ndzilekano wa mpfumawulo. Kutani loko xi hundza ndzelekano wa mpfumawulo wa xona n'winyi, xi va lexi nga riki na swipimelo eka leswi xi nga swi endlaka.

Nakona ndza ehleketa, kwalahaya, leswaku hi kuma dyondzo. Loko hi hundza ndzelekano wa mpfumawulo wa hina vinyi, endzeni ka Rito ra Xikwembu, kutani a swi na swipimelo leswi Xikwembu xi nga swi endlaka hi munhu loyi a lunghekeke ku ya ehandle ka muxaxa, muxaxa wa munhu, hi sweswo. Sweswi, hi vona sweswo, ku ya ehandle ka muxaxa, ku ya ehandle ka leswi.

⁴⁹ Ndzi vona Sathana, na yenavu, u le ku tekeni ka vanhu va yena ku ya ehandle ka muxaxa wa ku anakanya, ku ya ehandle ka—ka—ka—ka muxaxa wa—wa matwisiselo ya mani na mani. Sathana u le ku yiseni ka vanhu va yena endleleni leyin'wana, ku ya ehandle ka muxaxa; Xikwembu xi le ku yiseni ka vanhu va Xona ehandle, endleleni leyin'wana. Nakona Sathana u va yisile ehandle ka muxaxa wa mikuva leyinene. Loko swi fika eka xiyimo lexi vanhu...na swona va nga tikhoma na ku endla, kutani va tshikiwa va hundza na swilo leswi va swi endlaka namuntlha hi tlhelio ra matikhomelo. Swi le handle ka maanakanyelo ya mina hilaha wanuna a nga vekaka nsati wa yena le handle, a ambarise xisweswo, kutani a phakata munhu un'wana hikwalaho kova a n'wi rhukana. Swi le handle ka matwisiselo ya mani na mani. A fanele ku tiva ku tlula sweswo. Ehandle ka mikuva leyinene! Yi kwihi ndhawu yo yima ka yona xana?

⁵⁰ Wanuna kumbe wansati un'wana wo ringana na mina hi vukhale, ndzi nga ku vutisa leswi. Swi ngava njhani loko manana wa mina kumbe wa wena, kwalomu ka makume ntlhanu wa malembe lawa ya hundzeke, a yile ehandle le xitarateni hi pherhe leyi ya leswo koma kumbe tibikini, hambi mi swi vitana yini, a swi ambarile? Nawu a wu tava wu va vutile, xikan'we-kan'we, na ku va veka exibedlele xa tinhlanyi. Manana u sukile endlwini ya yena a nga ambalanga swiambalalo swa yena swa le henhla, nakona a fanele kuva a exibedlele, hikuva emiehlekeweni ya yena ku na leswi hoxekeke. Kutani loko kuruku i ku ehleketa ku endla nchumu wo tani hi walowo, hakunene i xikombiso xa leswaku swin'wana swi yile eka vuhlanyi. Swa hari nkayivelo wa miehleketo, ku ya ehandle ka ku anakanya; thyaka!

⁵¹ Nakona loko wanuna a nga dzaha tisigarete, kutani madokodela ma khorwisa leswaku magidigidi ma fa lembe rin'wana na rin'wana hikwalaho ka xivangelo xexo, ivi a tama a ha koka tisigarete, swi tikomba ingaku kuna swin'wana swi nga hoxeka hi miehleketo ya wanuna yaloye.

Kutani loko wanuna a ri na ku vaviseka ka miehleketo, nakona a nga...a nga tivuyeteli, leswi a swi endlaka, u ta lavalava hofisi ya dokodela un'wana na un'wana loyi a nga kona etikweni, ku kumisia leswi nga hoxeka hi yena. Kambe endzhaku u ta yima endhawini ya byalwa kumbe emovheni, kutani a nwa kukondza a hlangana nhloko hi ku hetiseka; a tirhisa mali ya yena, ku tinghenisa a ti ndondovetela eka sweswo. Kutani loko a nga kumeka a yile eka swona handle ka ku pyopyiwa hi xihoko xa byalwa, kutani u ta tirhisa peni yin'wana na yin'wana leyi a yi kumaka, ehofisini ya dokodela, ku ringeta ku kumisia leswi nga hoxeka hi yena. A swi twisiseki.

⁵² Loko ku nga ta xikhuzana xa tihuku xi ri karhi xi haha ehenhla ka doroba, ivi ndzi teka xibalesa xa mina, kutani ndzi huma ndzi ya endzhaku ka jarata ra mina ivi ndzi balesa xikhuzana lexi, hi khume ra timinetse ku sukela kwalano ndzi tava ndzi ri ejele. Va ta ndzi khoma, "Hikwalaho—hikwalaho ka matikhomelo yo ka ya nga amukeleki; ku khoma xibalesa edorobeni; ku veka vutomi bya vanhu ekhombyeni, hi xibalesa, ku balesela xikhuzana emoyeni." Ndzi nga dlaya munhu, va nga vula tano. "A fanele ku yisiwa ekule."

Na swona va ta xavisela wanuna byalwa byo ringanelu ku n'wi pyopya, kutani swi n'wi hoxa emovheni lowu nga dlayaka ndyangu hinkwawo wu helerile. Kutani loko a kumiwile, u va nyika ntlhanu wa tidolara na nxavo. Mudlayi loyi a tiyimiserile! Xana xiphijo xa misava i yini? Swin'wana swi hoxekile kun'wana.

⁵³ Sweswi, "ku ya ehandle ka muxaxa," ku ya ehandle ka mikhuva leyinene, ku ya ehandle ka ku anakanya.

Mi swi xiyisia, va n'wa-tipolotiki va hina namuntlha va ngaka va nga vuli nchumu mayelana na ku hlayiwa ka Bibele exikolweni. Va chava. A va swi tivi leswaku moya wu ba wuya kwihi. A va swi tivi leswaku va ta lahlekeriwa hi vhothi, kumbe ee. Hi lava un'wana Abraham Lincoln. Hi lava un'wana John Quincy Adam. Hi lava munhu loyi a nga ta yima, swi ngari na mhaka leswaku moya wu ba wuya kwihi, kutani a nyikela vupfumeri bya yena lebyo tshembheka.

⁵⁴ Namuntlha, muchumayeri wa xidinominexini, hambi loko u n'wi komba hi Rito, Ntiyiso, a nga swi tivi leswi a faneleke ku swi endla. U chava leswaku a nga lahlekeriwa hi thikithi ra yena ra swakudya. Hi lava vavanuna na vavasati namuntlha lavo tiya hi Evhangeli, munhu loyi a nga ta yima ivi a vula kupfumela ka yena loku tiyek, a komba leswi lulameke na leswi nga lulamangiki, loko kuruku Rito ra Xikwembu ri lulamile kumbe loko kuruku dinominexini yi lulamile.

⁵⁵ Yesu u te, “Rito ra un'wana na un'wana a rive vunwa, kutani ra Mina ri va Ntiyiso. Matilo na misava swi ta hundza, kambe Marito ya Mina ya ngaka ya nga hundzi.”

⁵⁶ Swingaleswi, ma swi vona, va hundza emixaxeni ya Rito ra Xikwembu, kuya kuma nhlamulo ya vona. Hina... a ri... u va khorwisile ku suka emixaxeni ya Rito ra Xikwembu, tani hilaha a endleke Evha hakona entangeni wa Eden, Sathana u endlile nchumu walowuya namuntlha. Hi swona. Hi kuma sweswo. Vanhu va khorwisiwa kuya eka tidyondzo ta kereke na mikhuva ya vona ehandle ka muxaxa, emuxaxeni wa vona ya tidyondzo ta kereke na mukhuva. Va na muxaxa, na vonavu, kutani sweswo swi va veka endzeni ka muxaxa wa yena. Wa yena i muxaxa wa dyondzo, ntivo vukhongeri, mintirho, digiri ya vudokodela, swa dyondzo, swa yumunhu, hinkwaswo leswi lwisanaka na muxaxa wa Rito ra Xikwembu. Xikwembu xi na muxaxa wa vanhu va Xona. Dinominexini yi na muxaxa wa yona n'winyi.

⁵⁷ Magidi nharhu wa malembe lawa ya hundzeke, wanuna a swi kota ku hlangana na Xikwembu hakanyingi kun'wana na kun'wana. A kuri nchumu lowu tolrevelekeke kuva wanuna a hlangana na Xikwembu. Kambe hikwalaho ka yini va nga hlangani na Xona namuntlha? Ku na vanhu votala, magidi ku andzisa hi magidi na mamiliyon i ya vanhu votala ku tlula lava a vari kona eka magidi nharhu wa malembe lawa ya hundzeke, nakona hambi swiri tano Xikwembu i nchumu wun'wana wa khale lowu a ku vulavuriwa hi wona, matimu man'wana ma khale. A va hlangani na Xikwembu, hi vox, kukotisa leswi a va swi endla malembe lawa ya nga hundza, tani hilaha ndzi vuleke, magidi nharhu, magidi nharhu wa malembe lawa ya nga hundza. A va swi endli. A swi tolrevelekanga kuva munhu a hlangana na Xikwembu. Loko wanuna a vulavula hi swona, u tekiwa tani hi

loko a ri munhu loyi a hlanyaaka, munhu loyi a lahlekeriweke hi miehleketo ya yena. A swi tollovelekangi eka vona!

⁵⁸ Hi mayelana na Abraham nale mixaxeni ya yena, hikwalaho ka yini, hakanyingi a kuri mhaka ya masiku hinkwawo kuva Abraham a hlangana na Xikwembu. U vulavurile na Xona. Ku ngari sweswo ntsena, kambe loko va tava va yile eGerar, kuya tshamanyana; hi kuma leswaku, le hansi, leswaku Xikwembu a xiri emixaxeni na Abimelek, wa Mufilista. A kuri nchumu wo tolloveleka. A va hanya emixaxeni ya Vukona bya Xona.

Namuntlha, va hanya emixaxeni ya vona vinyi, nakona a va lavi nchumu xo xiendla hi muxaxa wa Xikwembu. A va lavi nchumu xo xiendla hi wona, hikuva wu bayizani eka misava. Wu bayizani eka vona. Kambe, tsundzukani, loko Xikwembu xi simekile muxaxa wo sungula eka vanhu, Xi va tiyisile hi Rito ra Xona. Xa swi endla minkarhi hinkwayo. Kambe, namuntlha, emixaxeni ya vona, a va swi endl. Xexo hi xona xivangelo xova mi nga twi swotala mayelana na Xikwembu. Sweswi, ndzi pfumela leswaku e—leswaku e muxaxa . . .

⁵⁹ Tani hi Muxe, hilaha Xi hlanganeke na Muxe emananga. Muxe a ri na muxaxa kwalahaya laha a ri eku byiseni ka tinyimpfu ta mukon'wana wa yena, Yetro, endzhaku ka mananga. Kutani siku rin'wana, eka murisi loyi wa makume nhungu wa malembe hi vukhale, u vonile Layiti, Langavi ra Ndzilo exihlahleni, lexi pfurhaka. Kutani u hlanganile na Xikwembu; wanuna loyi a tsutsuma Xikwembu.

Hi siku leri landzelaka. Nkarhi wun'wana ku hlangana na Xikwembu swi ku endla leswaku u endla swilo leswi nga tollovelekangiki. Muxe a ri loyi a nga tollovelekangiki, hi siku leri landzelaka. U khandziyisile nsati wakwe ehenhla ka mbhongholo, a ri na n'wana enyongeni ya yena; na malebvu yakwe yo lehela ehansi, na nhonga yo gombonyoka evokweni ra yena, a ri karhi a ya eEgipta, kuya vutla tiko. Sweswi, walowo a wu ri mbono wo hlekisa!

“Xana u ya kwihi, Muxe?”

“Ndzi ya eEgipta.”

“U ya endla yini?”

⁶⁰ “Ku ya ri vutla!” A hlanganile na Xikwembu. Ku hlasela ka munhu un'we. A swi languteka swi nga tollovelekanga hi ndlela yo chavisa. Kambe, mhaka ya kona a kuri ku, u swi endlile, hikuva u hlanganile na Xikwembu. Ntsena tani hi loko munhu un'we a ya eku vutleni ka Russia; hi sweswo ntsena leswi u swi lavaka, munhu un'we eka ku rhandza ka Xikwembu. Muxe a ri eka ku rhandza ka Xikwembu. Nakona a ri na nhonga yo gombonyoka evokweni ra yena, ku ngari tlharhi; nhonga. Swilo leswi nga tollovelekangiki, Xikwembu xa swi endla.

⁶¹ Kambe, tsundzukani, Muxe a fanele ku humela ehandle ka muxaxa lowu a hanya eka wona, kuva a endla leswi, hikuva u vile kwalahaya na vuthu leri heleleke kambe a nga ta swi kota. Hi mavuthu hunkwawo ya Egipta, a nga ta swi kota. Kambe siku rin'wana Xikwembu xi n'wi rhambile endzeni ka muxaxa wa Xona.

A ku, "Hi Wena mani?"

⁶² Xi ku, "HI MINA LOYI A NGA KONA," Ku ngari, "Loyi a ri kona, kumbe loyi a nga tava kona." Nkarhi wa sweswi, "LOYI A NGA KONA! Hi mina Xikwembu xa Abraham, Isak, na Yakob. Ndzi swi twile swirlilo swa vanhu, kutani Ndzi tsundzukile xitshembhiso xa Mina, na swona lowu hi wona nkarhi wa kuva leswi swi hetiseka. Ndzi ku rhumela le hansi, Muxe, na nhonga leyi nga evokweni ra wena."

⁶³ A kuri yini xana? Yena, sweswi, vanhu a va ehleketa leswaku wa hlanya. Kambe xana u endlile yini? U humile ehandle ka muxaxa wa yena. Faro u n'wi dyondzisile makume mune wa malembe emuxaxeni wa xikolo, kutani u tsandzekile. Nakona swi tekerile Xikwembu makume mune wa malembe man'wana ku swi humesela ehandle ka yena. Dyondzo ya yena hinkwayo na ntivo vukhongeri bya yena hinkwabyo lebyi a dyondzisiweke byona, swi tekile makume mune wa malembe ku byi humesela ehandle ka yena. Kutani Xikwembu xi n'wi tirhile ku ringana makume mune wa malembe.

⁶⁴ Xikwembu xi na nkarhi wo chavisa ngopfu kuva xi lulamisa munhu wa Xona. Kambe, ma swi vona, a Xi ngata kala xi kuma Mux-...ku kuma Muxe, kukondza Muxe a humela ehandle eka muxaxa wa yena lowu endliweke hi munhu, ku suka eka ndlela yo swi endla hi yona ya vuthu ra nyimpi, na ndlela yo swi endla hi yona ya ntumbuluko, kuya eka ndlela yo swi endla hi yona leyi nga ehenhla ka ntumbuluko. Kutani, loko a nghenile emuxaxeni, Xikwembu a xi kota ku n'wi tirhisa.

⁶⁵ Sweswi, hi kuma leswaku emananga lawa... Hi lemuka leswaku loko va tava va tekile na ku yimela timhaka ta vona, kutani va huma eEgipta, ku nghena emuxaxeni wa Xikwembu; ku humela ehandle ka muxaxa wa vaprista na swona hinkwawo ka vona va ri karhi va ku, "Tixaviseni kuva mahlonga, vutomi hinkwabyo." Loko muprofeta Muxe a rhelerile ivi a tiyisisa leswaku Rito ra Xikwembu a ri ri ekusuhi, leswaku Xikwembu Lexi endleke xitshembhiso a xi ri kona ku ponisa vanhu; va sukile emuxaxeni lowu a va ri eka wona, va nghena emuxaxeni wa Rito ra Xikwembu ra xitshembhiso xa awara. Va pfumerile muprofeta ya loye, hikuva xikombiso xa ku tiyisisa a xi ri eku khorwiseni leswaku a kuri Rito ra Xikwembu hakunene. Nakona swilo leswi a swi endleke a swi khorwisa leswaku a swi lulamile, na swona Langavi ra Ndzilo a ri n'wi landzelela, ku khorwisa leswaku a kuri Rito ra Xikwembu.

⁶⁶ Sweswi, emuxaxeni lowu, mahlori, masingita, na swihlamariso a swi ri kona emuxaxeni lowu.

Va va humesele ehandle emananga. Va siyile muxaxa wa vona wa ntumbuluko. Va siyile muxaxa wa ndzhope. Va siyile muxaxa lowu endliweke hi tinhlanga na switina, kuya tshama ematendeni le handle emananga, laha a ku ngari na tindoho kumbe swin'wanyana. Nkarhi wun'wana Xikwembu xi hi kombela ku endla swilo swa vuphukuphuku, hi ku ehleketa ka hina. Kutani loko mi nga siya muxaxa wa ku anakanya ka n'wina, yaleyo i ndhawu leyi mi nga ta kuma Xikwembu.

⁶⁷ Xiyisisani, loko va ri karhi va huma va nghena emananga, a kuri na mahlori, masingita, loko va nghena emuxaxeni lowu. Tsundzukani sweswi, va sukerile muxaxa wa Egipta ivi va nghena emananga na muxaxa wa Xikwembu. Xana mi swi tivisa ku yini leswaku a kuri wona? Xikwembu xi te, "Vanhu va wena va ta luvela ku ringana mune wa madzana wa malembe, kambe Ndzi ta va humesa hi voko ra matimba, nakona Ndzi ta va nyika tiko leri lahawani." Kutani va vile endleleni ya vona, hi Layiti leyti tiyisisiweke, muprefeta loyi a tiyisisiweke, hi masingita, swihlamariso, leswaku Xikwembu a xi ri emuxaxeni, na swona a vari endleleni. A va ri na Langavi ra Ndzilo. A va ri na muprefeta. A va ri na mana. A va ri na mamati lawa ya hanyaka. Amen! A va cincile, a va cincile timbala ta muxaxa. A va fanele ku swi endla. A va nga ta swi vona swilo leswiya eEgipta. A va fanele ku cinca timbala ta muxaxa, kuva va vona leswi nga ehenhla ka ntumbuluko.

⁶⁸ Na vona vanhu va siku leri va ta fanelia ku cinca muxaxa eka tidinominexini leti ti nge, "Masiku ya mahlori ya hundzile. Ku hava nchumu wo tani hi nkhuvulo wa Moya lowo Kwetsima. Na swona Matsalwa lawa hinkwawo ya hoxekile; nakona ya tirha eka nguva yin'wana." Mi ta fanelia ku cinca timbala ta muxaxa wa n'wina, mi hundza eka muxaxa walowo, kuya laha swilo hinkwaswo swi kotekaka.

⁶⁹ Hinkwaswo ka swona a swi tiyisisa Vukona bya Xona emuxaxeni. Kutani sweswi xiyisisani, vona, va endlile muxaxa lowu endliweke hi munhu wa mindhavuko na mikhuvu ya kereke, endzhaku ka loko Muxe a tava a file. Kutani Xikwembu xi tirhanile na vanhu lava malembe yotala. Xikwembu a xa hari emuxaxeni wa Xona, na swintsongo, emuxaxeni wa vona, hikuva va tiendlerile muxaxa, muxaxa lowu u tiendlela hi wexe.

⁷⁰ Tsundzukani, loko va tava va vitaneriwe ehandle ka Egipta, Xikwembu xi va nyikile muprefeta, xi va nyikile xinyimpfana xa xitlhavelo, xi va nyikile hinkwaswo leswi a va swi lava; rito, masingita, mahlori, muprefeta wo va rhangela, xikhumelo xo va hlayisa, Langavi ra Ndzilo ro va rhangela. Kutani loko va tava va humile va nghena emananga, a va nga se eneriseka. A va lava nchumu lowu va nga ta wu endla, hi vox. Tintswalo ti swi tisile

sweswo; sweswi va lava nchumu wo tiendlela, hi voxé, leswaku va ta tiendlela vandla, na ku holova na ku lwa na ku vilela, i mani a nga tava muprista lonkulu, na ku i mani a nga tava *leswi, sweswo*, kumbe *leswin'wana*. Siku rin'wana, Xikwembu xi te, "Muxe, tihambanisi na vona," ivi Xi va mita hi nkanetano wa Korah.

⁷¹ Xiyisisani sweswi, hinkwawo masingita lawa na swihlamariso swi tiyisisisile Vukona bya Xona.

Kutani a ti endlela...munhu a tiendlela muxaxa, muxaxa wa mikhuva na ndhavuko, ku ngari muxaxa wa Xikwembu wa Rito ra Xona. Muxaxa wa vona vinyi! A xi fanele ku va sukela, hikuva hi Xona Rito. Xi ngaka xi nga tshami laha vanhu va dyondzisiwaka kuva ehandle ka Rito leri. Xikwembu xi ngaka xi nga tshami emuxaxeni walowo. Xi ngaka. A xi se tshama xi swi endla. Xi fanele ku tshama laha Rito ra Xona ri nga kona.

⁷² Loko Xi tava xi fanele ku sukela muxaxa walowo, kutani, eka ntlawu luwa hinkwawo wa vanhu lava Xi va humeseke Egipta, Xi tshamile ntsena eka vaprofeta va Xona, eka lava Rito ra Xona ri yeke ka vona. Rito ri yile eka muprofeta, ku tiyisisa awara. Ri tshamile exikarhi ka vaprofeta, na ku paluxeriwa vaprofeta. Hilaha va rhukaneke, vanhu, na ku rhukana nchumu walowo. Kutani Xikwembu xi va dyondzisile milawu ya Xona na ndlela ya vutomi. Na swona vanhu a va tshamela ku lwsana na yona, kutani va xanisa muprofeta, ivi va hetelela va n'wi khandla hi maribye, kumbe ku n'wi sahelela a va swiphemuphemu, na ku n'wi cukumeta.

⁷³ Yesu u te, "Hi wihi muprofeta loyi vatata wa n'wina va nga n'wi dlayangiki xana? Hi wihi eka vona, wa lava va lulameke loyi a rhumeriweke eka vona xana?" Kutani a ku, "Mi endla mintirho ya tata wa n'wina." A nga vulavuli na makhomunisi. A vulavula na vaprista, vanhu va dinominexini, Vafarisi na Vasaduki. Ndza tshembha leswaku rito ra Yena a ri ngata cinca swinene ngopfu vusiku lebyi, ri to nyanya nyana, kumbexani, eka vona.

⁷⁴ Sweswi, hi kuma leswaku a Xi tshama exikarhi ka vaprofeta va Xona. Xi vuye xi hundzuka muluveri eka vona, hikuva Xi tshama ntsena eRitweni ra Xona, ku Ri tiyisisa. Bibele yi vurile leswaku Xi rindza Rito ra Xona, ku Ri tiyisisa. Xi le ku ringetenii ka ku kuma munhu un'wana.

Loko ntsena Xi nga kuma munhu wa mbilu ya hafu, kukotisa Samson. Samson u nyikerile matimba ya yena eka Xikwembu, kambe u nyikerile mbilu ya yena eka Delila. Yaleylo i ndlela leyi hi minkarhi yotala hi endlisaka swona, namuntlu, ntsena ku nyikela swin'wana eka Xikwembu, kambe ku ngari hinkwaswo. Kambe, Xikwembu xi hi lava hinkwerhu ka hina.

⁷⁵ Kukotisa pholisi ya ndzindza khombo, loko u kuma pholisi ya ndzindza khombo, u nga ha tikumela na vuhlayiseki byo helela. Nakona sweswo hi leswi xitiyisiso lexi katekisiweke xi

hi endlelaka swona. I pholisi ya vuhlayiseki byo helela. Yi katsa hinkwaswo leswi hi swi lavaka laha evuton'wini lebyi, na ku pfuxiwa ka hina, na Vutomi lebyi nga Heriki. Yi katsa xin'wana na xin'wana.

⁷⁶ Xiyisisani, Xikwembu xi tshamile ehandle ka muxaxa wa vona ku ringana mune wa madzana wa malembe. Hikokwalaho ka yini? A xi nga hari na vaprofeta van'wana. Ku suka eka muprofeta Malakiya, kuya eka muprofeta Yohana, mune wa madzana wa malembe, ku hava ku hundzuluka na kan'we ka vhilwa loku Israel ri ku endleke. Xikwembu a xi ri ehandle ka muxaxa. Va Xi vekile ehandle, hi mikhuva ya vona ya kereke na vuciva bya vona, na hi ku hambanana ka vona eka Rito. Mune wa madzana wa malembe ku ngari na Rito! Ku suka eka muprofeta un'we kuya eka un'wana, Xi endzerile, kukondza muprofeta wo hetelela a va Malakiya, kutani a ku vanga na muprofeta un'wana ku ringana mune wa madzana ya malembe.

⁷⁷ Kutani Xikwembu xi vuyile eka mbono nakambe. Siku rin'wana Xi fambile exikarhi ka vona nakambe, kambe mindhavuko ya vona a yi tekile ndhawu ya Xona swonghasi exikarhi ka vona, a Xi ri muluveri eka vona. Mindhavuko ya vatatana, a vari na tindhichi to hlantswela kona, na—na ndlela yo fuwa misisi ya vona, na ku ambala tikunupu to karhi emabajini ya vona, na mikhancu ya vona ya vuprista—vuprista; nakona—nakona un'we i Mufarisi, ivi loyi un'wana a ri Musaduki. Kutani sweswo swi tekile ndhawu ya Rito exikarhi ka vanhu, ku fika laha, loko Xikwembu xi va endzerile, a Xi ri muluveri.

⁷⁸ Mi nge ndzi vula leswi hi rirhandzu na xichavo, kambe ku swi kongomisa ekaya. I nchumu lowu fanaka na namuntlha. A wu se cinca na swintsongo. Loko Xi ta exikarhi ka vanhu, hi matimba ya Xona na ku tivonakarisa, ku khorwisa leswaku Rito ra Xona hi rona leriya ra tolo, namuntlha, na hilaha ku nga heriki, hikuva hi Xona Rito, vanhu va ri, "Xingomatanda, Beelzebub, Yesu ntsena, kumbe—kumbe swin'wana swo kotisa sweswo." Van'wana va ku veka kun'wana, kambe swi fanele kuva hi ndlela yaleyo.

Wa vona, a hi se va na muprofeta lahawani ku lava ku fika magidi mbirhi ya malembe. Vamatiko a va vanga na un'we, ma swi tiva; u tshembhisiwile emakumu. Sweswi, ha swi tiva sweswo, hi Matsalwa. Ha swi tiva sweswo, nakambe, hi matimu leswaku leswi swi tshembhisiwe eka hina.

⁷⁹ Sweswi, endzhaku ka mune wa madzana wa malembe, Xikwembu xi fambile exikarhi ka vona siku rin'wana. Hi kuya hi Matsalwa, a Xi fanele ku endliwa nyama kutani xi tshama exikarhi ka vona. "U ta thyiwa Vito ra Muchaveleri, Hosana ya Kurhula, Xikwembu xa Matimba, Tatana loyi a nga riki na ku Hela."

Kute loko A tile exikarhi ka vanhu, va ku, “Hi ngaka hi nga fumiwi hi Wanuna loyi! Xana—xana i khadi ra xinakulobye muni leri A ri khomeke? Xana i dinominexini yihi leyи yi N’wi rhumeke?” A ngari na ntirhisano. Kereke yin’wana na yin’wana leyи A yeke ka yona, va N’wi cukumeterile ehandle. A va ngari na xo xi endla hi Yena, hikuva A ngari un’wana wa vona.

Kutani tani hilaha a swi ri hakona, swi tano na sweswi! Bibele yi vurile leswaku kereke ya Laodekiya yi ta N’wi veka ehandle, nakona A ri eku gongondzeni, ku ringeta ku nghena endzeni. Ku na swin’wana leswi hoxekeke kun’wana.

⁸⁰ Sweswi, hikokwalaho ka yini? Va endlile muxaxa wa vona vinyi. Vona, loko kuruku a va tivile Rito, a va tava va swi tivile leswaku A ri Mani. Yesu u te, “Loko n’wina . . . Lavisisani Matsalwa, lawa eka Wona miehleketa leswaku mi na Vutomi lebyi nga Heriki. Hi wona lawa ya mi byelaka leswaku hi Mina Mani!” Sweswo hi leswi Matsalwa ya nga swi vula. Sweswi, “Ya nyika vumbboni hi Mina. Kutani loko Ndzi nga endli mintirho leyи yi tschembhisiweke kuva Ndzi yi endla, loko Ndzi nga endli mintirho ya Tatana wa Mina, a nga Rito . . . ‘Eku sunguleni Rito a ri ri kona, nakona Rito a ri ri na Xikwembu, kutani Rito a xi ri Xikwembu. Kutani Rito ri endliwile nyama kutani ri aka exikarhi ka hina.’ Sweswi, loko kuruku Ndzi yena Munhu yaloye, lavisisani Matsalwa kutani mi vona leswi Ndzi faneleke ku swi endla. Kutani loko Ndzi nga fikeleli swilaveko; loko mintirho ya Mina, mintirho leyи Rito ri nyikaka vumbboni bya yona, Tatana a nyikaka vumbboni ha Mina, loko yi nga tiyisisi leswaku hi Mina Mani, kutani Ndzi hoxekile.” Hi swona sweswo. “Loko mi nga pfumeri eka Mina, pfumelani Rito,” A ku, “mintirho leyи Rito ri yi humesaka.”

⁸¹ Wa vona, A ri muluveri exikarhi ka vona. A va nga N’wi tivi. “A hi nga tava na xo xi endla na Nakulorhi loyi, ntsena Nakulorhi loyi a nga twisisekiki loyi a tswariweke le xitaleni kun’wanyana.” Nakona a va pfumela leswaku mana wa Yena u vile na N’wana loyi loko A nga se tswariwa, kumbe loko A nga se . . . u vile na N’wana loyi hi vuhunguki, kumbexani. Kutani, vona, leswaku loko N’wana a nga se tswariwa, leswaku u yile a ya tekana na Yosefa; nakona u endlile sweswo ntsena ku susa xinyama ehenhla ka wansati, yumunhu bya yena. “Kutani U hundzukile Nakulorhi wa muxaka wo ka a nga twisiseki, hikuva A ri n’wana loyi a tswariweke hi vuhunguki, kutani xexo hi xona xivangelo xova A ri tano.”

Nakona loko A tava a humelerile, xana U endlile yini? U handzulerile mikhuva ya vona ya kereke, a khubumeta matafula ya vona, a va ba va humela ehandle, kutani a ku, “Ku tsariwile!” Amen! Sweswo a swi fanele ku vula leswaku A ri Mani. “Ku tsariwile!”

⁸² Hi swona, a va nga tava na nchumu xo xi endla hi Nakulorhi wo tani hi yaloye. Kambe le makorhwени ya timbilu ta vona, a va swi tiva leswaku A ri Mani, hikuva Nikodema u swi vurile erivaleni sweswo. “Rabi, hina, Vafarisi, ha swi tiva leswaku u mudyondzisi loyi a humaka eka Xikwembu, hikuva a kuna munhu loyi a nga endlaka swilo leswi u swi endlaka loko Xikwembu xi ngari na yena.” Kutani hikokwalaho ka yini va nga N’wi vulanga? Hikokwalaho kova muxaxa wa vona vu vekile ndzelekano wa wona. A wu nga ta N’wi pfumelela ku nghena emuxaxeni. A wu nga ta pfumelela munhu na un’we ku huma a ya eka Yena. A va ri na muxaxa wa vona vinyi. U tile na vusiku, loko nyangwa wu tava wu pfariwile. Kambe u kumile leswaku a ta swi kota, ku hlangana na Yena, hambi swiri tano.

⁸³ Ina, swa fana sweswi! Va na . . . U hundzukile muluveri, wa matiko mambe. A va Ri twisisi. “Hikokwalaho ka yini *leswi* swi tava tano, nakona hikokwalaho ka yini *sweswo* swi tava tano?” Loko, Rito hi Roxe ri nyika vumbhoni bya leswaku leswi hi swona leswi faneleke ku endliya esikwini leri. Hilaha hi hundzeke eka swona, hi vuyelela hi tlhela hi vuyelela, kambe i Ntiyiso.

⁸⁴ A ri tano, eka vona emuxaxeni wa vona, “Bayizani, mutshovi wa mindhavuko ya vona, muhlundzukisi wa tikereke ta vona, ntseña xingomatanda, muvutisi wa mimoya loyi a vuriwaka ‘Beelzebub.’ Sweswo hi leswi A ri swona.”

Na swona ndza tshembha, loko A tile exikarhi ka hina namunthha, A tava a ri nchumu lowu fanaka, eka hina. Hikuva, hi na ndhavuko, hi na dinominexini, a hi twanani hambi kuri ku twanana. Hikokwalaho ka yini? Ku na ndhawu yin’we ntseña laha vanhu va nga twananaka kona, leyi nga, ehansi ka Ngati leyi halatiweke. Nakona Ngati yi halatiwile, tani hi hluke ra vutomi, ku mirisa Mbewu leyi, yi nga Rito. Ehandle ka sweswo, mindzelekano ya hina ya xidinominexini yi ta tshama yi ri karhi yi fambisela vanhu ekule.

⁸⁵ Kambe A tava a ri muluveri namunthha. A ta vuriwa nchumu lowu fanaka. A ta tekeriwa goza, A ta humeseriwa ehandle ka muxaxa. Nakona a mi swi tiva xana . . . Bibele yaliya yi vuleke leswaku U ta ariwa hi vanhu, “Munhu wa mahlomulo, loyi a tivaka maxangu,” nakona va arile, “kasi hina a hi ku Wa biwa na ku xupuriwa hi Xikwembu,” rona Tsalwa leri vuleke sweswo. Muprofeta yaluwa a yimbeleleke, “Xikwembu xa Nga, Xikwembu xa Nga, U Ndzi tshikele yini xana? Marhambu ya mina, vona va Ndzi langutisa. Va tlhavile swandla swa Mina na minkondzo ya Mina.” Loko va ri karhi va yimbelela risimu rero ekerekene; Xitlhavelo xa vona, Xikwembu lexi a va ehleketa leswaku va le ku xi tirheleni, a va ri eku xi vambeni.

Swingaleswi swi tano na namunthha, Xikwembu xexiya!

⁸⁶ Vonani leswi muprofeta a swi vuleke, Amos, loko a fika eSamariya. Kutani switihlwana swa yena swi nghena endzeni loko a fikile kwalahaya na ku vona doroba leriya ra vubihi, vavasati va etlele exitarateni, na vavanuna, Amerika ra ximanguva-lawa. Loko a ri langutile, matihlo ya yena ya nghena endzeni. Nakona a ngari na munhu loyi a n'wi pfunetaka. A ngari na khadi ra xinakulobye. Xikwembu a xi n'wi rhumile. Xana vanhu a va ta ri yingisa Hungu ra yena? Ee, a va nga ta n'wi yingisa. Kambe u profetile, kutani a ku, "Xikwembu lexi mi koxaka ku xi tirhela hi xona xi nga ta mi herisa."

Na swona ndzi ri, hi Vito ra Yesu Kreste: Xikwembu xexiya tiko leri ri koxaka kuva ra xona, ri ri tiko ra vukhongeri, Xikwembu xexiya ri koxaka ku xi tirhela xi ta va herisa eku hombolokeni ka vona. Xi ta herisa dinominexini yin'wana na yin'wana yi suka exikandzeni xa misava, lexi va koxaka kuva va xi tirhela.

⁸⁷ Swingaleswi, xiyisisani, U va tshinyile, kutani va N'wi humeserile ehandle ka muxaxa wa vona. "Yesu u fele ehandle ka muxaxa." Va N'wi humeserile ehandle ka muxaxa, ehandle, le kule na mixaxa ya vona.

⁸⁸ Hi kuma leswaku Bibele yi swi vurile, esikwini leri ra makumu ehansi ka Nguva leyia Laodekiya, va ta endla nchumu lowu fanaka. Va ta humeseriwa ehandle ka muxaxa.

Sweswi vonani leswi A vulaka leswaku swi endliwa, hi ku pfala.

"Humani mi ya ehandle ka muxaxa," laha magandzelo a ya hisiwa kona. Hi kona laha A kumekaka kona. A ri Gandzelo.

⁸⁹ Sweswi, boti, sesi, xana ma swi tiva leswaku un'wana na un'wana wa n'wina u fanele ku tinyiketa; mi fanele kuva xitlhavelo xa Xikwembu; mi tshiketa swilo swa misava; mi tshiketa ku tiphina ka n'wina vinyi ka misava leyia; mi tshiketa swilo swa misava? Ma xi tiva xivangelo xa kuva vanhu va nga ta swi endla?

⁹⁰ Ma swi tiva, nyimpfu, nyimpfu a yi na nchumu handle ka nchumu wun'we wo wu nyikela, nakona sweswo i wulu. Nakona, sweswi, a yi komberiwi ku endla kumbe ku tumbuluxa wulu yo karhi ya lembe leri. Yi komberiwa ku humele... ku veka wulu.

A hi komberiwi ku tumbuluxa nchumu. Hi komberiwa ku veka mihadzu ya Moya. Hi leswaku, vundzeni bya nyimpfu, leswi yi nga swona endzeni, swi endla wulu ehandle. Kutani loko munhu a ri na Kreste endzeni ka yena, swi n'wi endla a fana na Kreste ehandle, ku ngari xin'wana xo ka xi ngari xa xiviri lexi tlhandlekiweke.

⁹¹ Hi swona, hi kuma leswaku loko swi humeleta, loko Kreste a vuya, xana U khomiwa njhani? Ntsena tani hilaha a swiri xiswona eku sunguleni. Swi vile tano nkarhi hinkwawo.

⁹² Swingaleswi, U va tshinyise xisweswo, lero va ti humesela ehandle ka muxaxa wa Yena, kutani va N'wi endla kukotisa mudyohi. Leswi, "U hundzukile xidyoho hikwalaho ka hina."

⁹³ Sweswi, endzhaku ka madzana-dzana ya malembe, ina, ku lava ku fika magidi mbirhi wa malembe, U endzerile muxaxa wa vona nakambe, hi kuya hi Rito ra Yena leri tshembhisiweke leswaku U ta swi endla emasikwini ya makumu. U endzerile muxaxa nakambe. U endzerile muxaxa, ku ya vonakarisa Rito leri namuntlha.

Ntsena tani hilaha A endzeleke le ndzhaku hi siku leriya, na swona U swi endlile hi siku ra Muxe. A ku ngari Muxe loyi a endla sweswo; Muxe a ri munhu. A kuri Kreste.

⁹⁴ Langutani Yosefa, vutomi; a rhandziwa hi tata wakwe, a vengiwa hi vamakwavo va yena, hikuva a ri muvoni. Kutani a va n'wi venga, handle ka xivangelo. Xexo a xi ri xivangelo xin'we ntsena lexi a va ta n'wi vengela xona.

I xifaniso xa kahle xa namuntlha, hakunene. Kereke, nakambe, yi venga swilo swa ximoya.

Kutani hi kuma leswaku u xavisiwile hi kwalomu ka swiphemu swa makume nharhu swa silivhere, swi endliya tani hi loko a file. A tekiwa ivi a vekiwa endlwini ya khotso; kukotisa hilaha Yesu a veke hakona exihambanweni. Wanuna un'we u lahlekile, ivi loyi un'wana a ponisiwa; na swona u tekiwile ku suka lahaya kutani a ya evokweni ra xinene ra Faro. Swi hi mukhuva lowu Yesu a endliveke hakona.

⁹⁵ A kuri Davhida, nakona u tsutsumile hi switarata, a ri karhi a rila, hosi leyi ariweke; ivi a tshama entshaveni, a rilela Yerusalem. Yaloye a ku ngari Davhida. N'wana Davhida, madzana mantsongo ya malembe endzhaku ka sweswo, u tshamile exigangeni xexiya ivi a rila hikuva A ri Hosi leyi ariweke exikarhi ka vanhu va Yena N'winyi. I Kreste, nkarhi hinkwawo.

Kutani, namuntlha, loko swi profetiwile leswaku Kreste u fanele ku nghena emuxaxeni, ma swi tiva leswaku ku humelerile yini? Swi tava tani hilaha a swiri xiswona nkarhi luwa. Swi fanele kuva hi ndlela yaleyo, ku hetisekisa leswi Rito lahawani ri tshembhisaka leswaku U ta swi endla.

⁹⁶ Tsundzukani sweswi, Kreste a ri kona hi nguva ya Nowa. Yaloye a ri Kreste, "Yesu Kreste wa hari yena wa tolo, namuntlha, na hilaha ku nga heriki," Rito ra awara leri ariweke.

⁹⁷ Xiyisisani, na byona vuprofeta bya Yena bya Nhlavutelo 3, byi kumeka, loko A vuya hi siku leri ro hetelela, tani hilaha A profeteke leswaku U ta vuya hi siku leri ro hetelela. Kutani xana U yi kumile yi ri njhani kereke ya Laodekiya? "Yi fuwile, yi nga pfumali nchumu." "Nakona yi tshamile tani hi hosikazi na swona a yi voni nhlomulo." "Kutani va N'wi humesele ehandle ka

kereke," a va ngari na ntirho na Yena. U yile ehandle ka muxaxa nakambe. Kambe a yi nga swi tivi leswaku a yi nga ambalanga nchumu, yi file mahlo, na kuva xisiwana; nakona a yi swi tivi.

⁹⁸ Nakambe, loko A nga vuya nakambe hi ndlela yaliya A ri hakona nkarhi luwa, A ta tshinya wansati un'wana na un'wana loyi a ambalaka leswo koma. A ta tshinya wansati un'wana na un'wana wa misisi yo bobawa, xikandza xin'wana na xin'wana lexi xi pendeweke, wanuna un'wana na un'wana loyi a ta tsongahateka ku fikela laha a pfumelelaka nsati wa yena ku endla sweswo. A ha ta yima, A ta handzulela dinominexini yin'wana na yin'wana leyi nga kona, ivi a herisa mukhuva wun'wana na wun'wana wa kereke lowu hi nga na wona. Ma pfumela leswaku A ta swi endla xana? [Nhlengeletano yi ku, "Amen!"—Muhleri.] Kunene A ta swi endla. Hi swona sweswo.

⁹⁹ Xana a va ta N'wi endla yini? A va ta N'wi veka ehandle ka muxaxa. Kunene a va nga ta tirhisana na Yena. Ee, nkulukumba!

¹⁰⁰ Sweswi hi N'wi kuma nakambe, esikwini leri, tani hilaha Bibele yi vuleke leswaku U tava hakona, a vekiwile ehandle ka muxaxa. Hikuva U tshama a ri yaluya, Rito, yaluya wa tolo, namuntlha, na hilaha ku nga heriki.

¹⁰¹ A va—a va N'wi lavi. Va N'wi arile nakambe, hi huvo ya vona. Va nga swi tsakela, namuntlha, kukotisa hilaha va endleka hakona loko A hari eku tengisiweni. Kutani namuntlha, loko Rito ra hari eku tengisiweni, xana ku humelerile yini? Va arile nakambe kukotisa hilaha va endleke hakona nkarhi luwa, kutani va amukela Barabbas, mudlayi, ematshan'wini ya Kreste. Huvo a yi ta endla nchumu lowu fanaka. Na swona, namuntlha, hikuva va arile Rito na xitiyisiso lexi hetisekeke xa awara, va tixavisile na ku tsakela Barabbas, Huvo ya nhlangano wa Tikereke ta Misava, mudlayi wa Rito. [Xivati lexi nga riki na nchumu eka thepi—Muhleri.]

¹⁰² Va landzula Rito ra Yena, va landzula nkhuvulo wa Yena, va landzula Matimba ya Yena, va landzula masingita ya Yena. Kutani hi mukhuva wa kereke kumbe ndhavuko nakambe, wa ku ambala tikholoro leti hundzuluxiweke, na hinkwaswo, va tiendlela mikhuva ya kereke, na swin'wana, va le ku ringeten, ehenhla ka mintirho leyinene. A va nga vekiwanga eVuton'wini, xo sungula. A va ri hava xo pfumela hi xona.

"Loyi a Ndzi tivaka, u tiva Tata wa Mina. Kukotisa leswi Tatana a Ndzi rhumeke, na Mina ndzi mi rhumisa sweswo." Xikwembu lexi rhumeke Yesu xi fambile endzeni ka Yesu. Kutani Yesu loyi a mi rhumaka u famba endzeni ka n'wina. "Loyi a pfumelaka eka Mina, mintirho leyi Ndzi yi endlaka u ta yi endla na yena. Yanani emisaveni hinkwayo, mi ya chumayela Evhangeli eka swivumbiwa hinkwaswo," wa ntima, wa xitshopani, wo basa, wa buraweni, hambi a ri yini.

“Masingita lawa ya ta landzela lava pfumelaka.” Ku fika kwihi?
“Misava hinkwayo, na le ka swivumbiwa hinkwaswo.”

¹⁰³ Muministara lontsongo wa Baptist, ku ngari khale ngopfu eTucson, u tile eka mina, a ku, “Makwerhu Branham, hi lexi xiphiko xa wena. U le ku ringetenet ka ku swi endla nguva ya xiapostola.” A ku, “Ku hava nchumu wo tani hi nguva ya xiapostola namuntlha. Nguva ya xiapostola yi herile.”

¹⁰⁴ Ndzi ku, “Yi herile? A ndzi nga swi tivi.”

Kutani a ku, “Hi swona, yi herile.”

Ndzi ku, “U tiyisile?”

A ku, “Kunene. Ndzi tiyisile,” a vula tano.

“Hi swona,” ndzi ku, “u ehleketa leswaku yi herise ku yini?”

A ku, “Yaleyo a yiri ya vaapostola.”

¹⁰⁵ Ndzi ku, “Petro u teri, hi Siku ra Pentekosta. Xana wa ri pfumela Rito ra yena?”

“Ina, nkulukumba.”

¹⁰⁶ “A ku, ‘Hundzukani, un’wana na un’wana wa n’wina, kutani mi khuvuriwa hi Vito ra Yesu Kreste. Hikuva xitsembhiso lexi xi le ka n’wina, nale ka vana va n’wina, nale ka vana va vana va n’wina, nale ka lava nga ekule, na lavo tala lava Hosi Xikwembu xa hina xi nga ta va vitana.’”

¹⁰⁷ Xitsembhiso lexi fanaka, hi fanele ku tlhelela eka xona! Dokodela Simon Petro u tsarile swiletelo. Bibele yi te, “Xana a ku na murhi eGilead? A ku na n’anga kona xana?”

Hi swona, ma swi tiva, loko mi teka swiletelo swa ka dokodela. Loko a kuma vuvabyi lebyi nga emirini wa n’wina, ivi a tsala swiletelo sweswo; mi fanele ku xi tata, mi kuma munyiki wa tiphilisi loyi a nga ta xi tata ntsena hi ndlela leyi xi tsariweke hakona. Hikuva, u fanele ku chela chefu swonghasi, na antidoti swonghasi, swonghasi leswaku miri wa n’wina wu kota ku swi teka. Ma swi vona, yena . . . Swi ringetiwile khale na ku khorwisiwa, kutani mi fanele ku teka swiletelo sweswo. Loko mi nga swi endli, mi kuma dokodela un’wana wa vuxisi loyi a nga ta xisiwa hi sweswo, loyi a nga swi tiviki ku pima murhi walowo kahle, u ta mi dlaya. Nakona loko a chela ku tsana ko tala ngopfu, a swi nga ku endleli swa kahle.

¹⁰⁸ Kutani sweswo hi leswi nga xiphiko hi n’wina madokodela yo tala. Mi le ku tlangeni hi swiletelo sweswo!

Petro u te, “Ndzi ta mi nyika swiletelo leswi nga heriki, n’wina, na vana va n’wina, na lava nga ekule, na lavo tala lava Hosi Xikwembu xa hina xi nga ta va vitana.” Ku ngari, “Tanani mi ta joyina.” Kambe, “Hundzukani, un’wana na un’wana wa n’wina, kutani mi khuvuriwa hi Vito ra Yesu Kreste eku rivaleriweni ka swidyoho, kutani mi ta amukela mbuyelo,” amen,

“wu nga Moya lowo Kwetsima. Hikuva xitshembhiso, swiletelo leswi, i swa n’wina, na vana va n’wina.”

Sweswi, van’wana va n’wina madokela ya vuxisi, tshikani ku tsala swiletelo leswi nga riki swa xiviri. Wa vona? Mi le ku dlayeni ka vanhu va ka n’wina. Ahaa. Xexo hi xona xivangelo xa kuva Nchumu wa xiviri wu ngari ku va fikeleni. Ina.

¹⁰⁹ Ma swi tiva, eka swiletelo leswi fanaka, hilaha dokodela a kumaka murhi wa yena. Va tshama va ri karhi va teka na... Vativi va sayense va ringeta ku kumisisa swin’wana, kutani va swi nyika vhondho, ivi va vona loko swi ri dlaya kumbe ee.

Kutani, ma swi tiva, murhi, wu na matshalatshala lawa wu nga ya endlaka. N’wina, mi nga hola, nakona wu nga mi dlaya, wa vona, hikuva vanhu hinkwavo a va fani na mavhondho, kumbexani.

Swingaleswi, kambe ku na nchumu wun’we hi swiletelo leswi, i swa hinkwavo.

¹¹⁰ Na swona, kutani, dokodela un’wana na un’wana wa xiviri loyi a nga tako... a nga na ripfumelo rotala swinene eka murhi wa yena n’winyi, a ngaka a nga vutisi munhu un’wana. Van’wana va vona i matoya ku fika laha va kumaka mubohiwa loyi a nga na xigwevo xa vutomi hinkwabyo, kutani va n’wi ntshuxa loko a hanya eka swona, va n’wi pfumelela ku teka swiletelo.

¹¹¹ Kambe, endhawini leyi, a hi ri na Dokodela wa xiviri. U tile, a ta teka xileriso, hi Yexe. Wa vona? “LOYI A NGA KONA.” Ku ngari, “Loyi a nga tava kona.” “Hi mina ku pfuka na Vutomi,” ku vula Xikwembu. “Loyi a pfumelaka eka Mina, hambi a file, u ta hanya. Un’wana na un’wana loyi a hanyaka a va a pfumela ka Mina a ngaka a nga fi.” Marta a ku... U te, “Xana wa swi pfumela leswi?”

¹¹² A ku, “Ina, Hosi, ndza pfumela leswaku hi Wena Kreste loyi a faneleke ku ta emisaveni. A swi na mhaka leswi hinkwavo ka vona va Ku vitanaka swona, ndzi swi vonile!”

¹¹³ Exihambanweni, U tekile nayiti, hi Yexe. Kutani hi Paseka ni mixo, rifu a ri nga ta N’wi khomeleta. “Hi mina ku pfuka na Vutomi.” Va N’wi tlhaverile rifu, kambe U pfukile, a hlurile rifu, tihelle, na sirha. U tekile nayiti, hi Yexe.

Nakona U rhumerile madokodela ehandle ku ya tsala swiletelo, lava a vari na nhlavutelo wa leswaku A ri Mani.

“Xana vanhu vari Mina N’wana wa munhu ndzi mani?”

¹¹⁴ Petro a ku, “U Kreste, N’wana wa Xikwembu lexi hanyaka.”

¹¹⁵ A ku, “U katekile, Simon. U swi kumile sweswi. Ndzi ku nyika swilotlela swa Mfumo. Hinkwaswo leswi u nga ta swi boha emisaveni, Ndzi ta swi boha eTilweni. Loko u swi ntshuxa emisaveni, Ndzi ta swi ntshuxa eTilweni.”

¹¹⁶ Kutani hi Siku ra Pentekosta, loko va tava va vonile hinkwaswo leswi swi ri eku humeeleni, u te... Va te, "Xana hi nga endla yini ku kuma ntlhavelo lowu?"

¹¹⁷ Hi loyi a hlayaka swiletelo. A ku, "Sweswi ndzi ya eku tsalenka swiletelo. I swa n'wina, nale ka vana va n'wina, nale ka lava nga ekule, na lavo tala lava Hosi Xikwembu xa hina xi nga ta va vitana."

Mi nga tlangi hi swiletelo; mi ta fa! Va swi endla leswi tsaneke swonghasi, namunlha, kukondza swi nga havi nchumu handle kova mati ya xidinominexini, hi swona sweswo, xihalaki xo tota ntsumbu lexi va xi tlhavelaka eka munhu loyi a feke ku endlela leswaku a fa swinene.

Oho, kambe, boti, wu kona ntoto wa xiviri! Wu kona murhi eGilead. I wa ku horisiwa ka munhu wa le ndzeni. Ntsena u nga tlangi hi swiletelo. Teka swiletelo ntsena hi ndlela leyiswi tsariweke hakona, kutani Xikwembu xa boheka eRitweni ra Xona; a xi boheki eka mukhuva wa kereke, kumbe nawu wa kereke, kumbe dinominexini. Xi boheka eRitweni ra Xona. Landzelala swiletelo, rero i tshaku ro sungula. Sungula kona, kutani u sayiniwile na ku lulamela kuya entirhwени.

Xiyisisani, "ehandle ka muxaxa."

¹¹⁸ Va hlawurile Barabbas namunttha. Loko Evhangeli yi yile endzhaku nale mahlweni, ku rhendzeleka na misava, masingita lamakulu na swihlamariso swi landzelerile mpfxelelo, kambe, ematshan'wini ya ku ta ivi va swi ringeta, va le ku joyineni ka Barabbas. "Loko hi nga seva na hansahansa leyi, na swin'wana, ekerekeni ya hina, hi tava va xiyimo xa le henhla tani hi hinkwavo ka vona." Sweswi va na Rhoma na hinkwavo kun'we, Barabbas. Xiyisisani, hi le ndzeni ka muxaxa wa lowo lowukulu.

¹¹⁹ Hi rhambiwile ku ya ehandle ka muxaxa walowo. "Yesu na yena, leswaku A ta kwetsimisa vanhu hi Ngati ya Yena N'winyi, u fele ehandle ka nyangwa. A hi humeni hakona hi ya ka Yena ehandle ka nyangwa," vonani, "hi ri karhi hi rhwala tingana ta Yena."

¹²⁰ Xana A khomisiwa tingana hikwalaho ka yini? Ku ngari hikuva A ri Mumethodist kumbe Mubaptist, ndza mi tiyisisa eka sweswo; ku ngari hikuva A ri Mufarisi kumbe Musaduki. Hikuva A ri Rito leri tiyisisiweke.

¹²¹ "Hi ri karhi hi rhwala tingana ta Yena," hikwalaho ka (yini?) Rito leri tiyisisiweke. Hi swona sweswo. Sweswo hi leswi Yena a swi endleke. U te, "Loko Ndzi nga endli mintirho ya Tata wa Mina, mi nga Ndzi pfumeli; loko Ndzi ngari nhlamulo eka swivutiso hinkwaswo swa Matsalwa."

¹²² Yesu wa Testamente Leyintshwa a ri Yehovha wa ya Khale. Swi lulamile hakunene! Ndza pfumela, tani hilaha a ndzi ri ku mi byeleni sweswi lahawani, nkarhi lowu nga hundza, kumbe

kun'wana enhlengeletanwini. Ku ngava ku nga vanga lahawani. "Yehovha wa Testamente ya Khale i Yesu wa Leyintshwa." Ma tsundzuka e—e—e...

Loko ndzi ri karhi ndzi ya eku hloteni ka vamaxinjani mixo lowuya, kutani a swi ri lahaya, minsinya yi nharhu leyikulu swi tsutsumela eka wun'we lowu tsemiweke lahaya, kwale ntshaveni; mina ndzi yimile kwalahaya ndzi swi hlalerile. Kutani ndzi tshinerile ekusuhi ivi ndzi hluvula xihuku xa mina, ndzi veka xibalesa xa mina ehansi, ndzi tlhandlukela kwalahaya. Kutani Rito ri ninginisa khwati, ri ku, "Yesu wa Testamente Leyintshwa i Yehovha wa ya Khale. Tshama u ri karhi u tshembheka." Swingaleswi ehansi kwalahaya hi laha vamaxinjani swi nga humeleta kona, kutani, swi va leswi hanyaka loko ku ngari na nchumu kwalahaya. Wa vona? Walowo i Ntiyiso. Wa vona? I ntiyiso. Swingaleswi, Xikwembu xa swi tiva, lexi ndzi yimeke emahlweni ka Xona, i Ntiyiso wa swona. Hi swona sweswo. I Ntiyiso.

¹²³ Le hansi eKentucky; nakona ku na vanhu lava tshameke kwala vusiku lebyi, a vari kona loko wu humeleta nakambe, nchumu lowu fanaka. Ina. Ha swi tiva leswaku walowo i Ntiyiso; Yesu wa Testamente ya Khale!

¹²⁴ Kukotisa loko Machayina va ta lahawani ro sungula, a va nga swi koti ku hlaya hambi kuri ku tsala ririm'i ra hina, kambe a vari vahlantswi va kahle va swiambalo. Swingaleswi a va ta... A mi ta ya le hansi endhawini yo hlantswela ya Machayina. A tikumela swo vonikela ntsena, swithikithani swo basa. A nga swi koti ku hlaya nchumu na wun'we, na swona a swi tiva leswaku a mi nga ta swi hlaya loko a swi tsarile. Swingaleswi, loko mi ta, a teka xiphemu lexintsongo xa phepha, swin'wana swa muxaka *lowu*, a hi nge, kona kwala, ivi a xi handzula hi ndlela yokarhi kukotisa *sweswo*. Sweswi, a mi nyika xiphemu xin'we xa phepha, ivi a hlaysia xiphemu lexin'wana xa phepha. Kutani loko mi vuyela swiambalo swa n'wina, a ku, "U nge ndzi vona xiphemu xa phepha ra wena." Kutani a swi teka; loko swi fambelana, a kuri sweswo. A mi kuma swiambalo swa n'wina swo thyaka swi basile.

¹²⁵ Kutani Yesu a fambelana na vuprofeta hinkwabyo; nkhaviso hinkwawo wa Yehovha wa Testamante ya Khale i Yesu wa Leyintsha. U fambelanile na hinkwaswo.

Ndzi pfumeleleni ndzi swi vula leswi hi xichavo xa vukwembu na nhloniphо, kambe hi rirhandzu, kambe hi ku tshembheka ka ku tiva laha ndzi yimeke kona. Hungu ra awara leyи ri fambelana na hinkwaswo leswi Bibele yi vulavuleke ha swona swa awara leyи. Sweswi, loko mi ri na swiambalo swin'wana swo thyaka, swi tiseni. Ahaa. Xana mi hlantswiwile hi Ngati ya Xinyimpfana?

¹²⁶ Xiyisisani, “hi ri karhi hi rhwala tingana ta Yena,” hikuva hi Yena la nga tiyisisiwa kuva a ri Rito. Kukotisa nkarhi luwa, swi tano na sweswi, Wa hari yena yaluya wa tolo, namunlha, na hilaha ku nga heriki. Vaheveru 13:12 na 13. Hi kuma Vaheveru . . . 8, 13:8, na yonavu. “Hi ri karhi hi rhwala tingana ta Yena,” ta Evhangeli.

¹²⁷ Ku rhwala Vito ra Yena! U te, “Ndzi tile hi Vito ra Tata wa Mina.” Xana Vito ra Tatana i mani? U tile hi Vito ra Tata wa Yena. A ku, “Ndzi tile hi Vito ra Tata wa Mina kutani a mi Ndzi amukelanga.” Hi swona? Xana Vito ra Tatana i mani? Ndza tshembha leswaku mi fanele kuva mi ri tiva. Wa vona?

Ku rhwala tingana ta Rito. A swi tshamela ku endliwa ehandle ka mixaxa ya vona. Va Swi humesele ehandle. Mi ta hlekuriwa, na ku vungunyiwa.

¹²⁸ Swingaleswi, namunlha, laha ndzi nga tshama ndzi sungula kona ku tsemakanya tiko. . . . Ku ngari ku vulavula hi mina n’winyi; ndzi kombela leswaku mi nga teki leswi tani hi loko swiri swa vun’winyi. Kambe, nkarhi wa mina wu fambile, nakona ndzi na kwalomu ka khume ra mapheji lahwani. Mi nga ya vona lawa ya nga sala lahwani, wa vona, wa vona, hi swona, ya tinotsi. Kambe, yingisani. Ndzi sungurile ehandle . . .

¹²⁹ Xana mi kale mi lemuka Yesu loko A ha sungula? “Oho, Rabi lontsongo. Oho, A ri Wanuna wa kahle! Tana haleno hi nga kona. Tana u ta hi chumayelela.”

¹³⁰ Kambe siku rin’wana U tshamile ehansi na vona, ivi A ku, “Handle kaloko mi nga dya nyama ya N’wana wa munhu, na ku nwa Ngati ya Yena, a mi na Vutomi eka n’wina.”

¹³¹ Xana mi ehleketa leswaku madokodela na lavo tlhariha entshungwini a va ehleketa yini? “Wanuna loyi i khema.” Wa vona? “U lava leswaku mi nwa ngati ya munhu. Sweswo hi nge swi koti. Fambelani ekule na Yena. Vona . . . vaprista va vurile leswaku A hlanya; ndza swi pfumela.” Kutani Bibele yi ri va sukile va famba.

¹³² Kutani A ri na makume nkombo wa vachumayeri lava hlawuriweke. Kutani A ku, “A ndzi nga tava na vona.”

Swingaleswi U va langutile, A ku, “Xana mi ta ku yini loko mi vona N’wana wa munhu a tlhandlukela eTilweni laha A humaka kona?” Sweswi, A nga kalanga a swi hlamusela swilo leswi. U lo va siyisa xisweswo. Wa vona?

¹³³ Kutani va ku, “N’wana wa munhu? Yini? Hi dya na yena Wanuna loyi. Hi phasa tihlampfi na Yena. Hi pavalala emabuwensi na Yena. Hi wu vonile ntehe lowu A mbuweteriwa hi wona. Ha n’wi tiva mana wa Yena. Ha n’wi tiva makwenu wa Yena. I mani loyi a nga ta amukela nchumu wo tani hi Lowu?”

Nakona Bibele yi ri, “A va ha fambanga na Yena.”

¹³⁴ Kutani U hundzulukerile eka Petro na hinkwavo ka vona, a ku, “Ndzi hlawurile khume mbirhi, n’wina va khume mbirhi.” Sweswi, ku suka eka magidi, U sele na khume mbirhi. A ku, “Ndzi hlawurile khume mbirhi. Kutani, un’wana wa n’wina i javulosi. Ndzi swi tivile, ku sukela eku sunguleni.” A ku, “Sweswi xana mi lava ku famba na vona?”

A nga fanelanga ku mbuwetela na ku bampatela, nakona, “Ndzi ta ku endla mudiyakoni loko wo joyina kereke ya mina.” Wa vona? Ku hava swihloka swo swi lota. A nga kalanga a swi hlamusela. Na vona vadyondzisiwa a va nga ta swi hlamusela.

Kambe, ma swi tsundzuka, U lo va byela, “Ndzi mi hlawurile ku nga seva na masungulo ya misava. Ndzi mi vekile kuva mi amukela ntsako na Mina.” Wa vona? Hi leswiya, “ku nga seva na masungulo ya misava,” ku hlawuleriwa emahlweni.

¹³⁵ Vaapostola lavaya va yimile lahaya va nga ninginiki. A va nga ta hlamusela hilaha a vaya eku dyeni ka nyama ya Yena na ku nwa Ngati ya Yena. A va nga twisisi hilaha A xikeleke ehansi, loko A vile kwalahaya na vona nkarhi luwa hinkwawo. A nga ta swi hlamusela. Vanhu a va nga ta swi hlamusela. Ku hava loyi a ta swi hlamusela.

Kambe Petro u virile marito lawaya yo twakala. A swi hlararisi kuva A n’wi nyikile swilotlela. U te, “Hosi, hi ngaya ka mani xana? Hi khorwisiwile. Ha swi tiva leswaku Wena, na swona Wena ntsena, u xitiyisiso xa Rito leri tshembhisiweke namunthha. Ha swi tiva leswaku hi Wena ntsena u nga na Rito ra Vutomi. Hi ngaka hi nga swi hlamuseli swilo leswi, kambe ha Swi pfumela, hambi swiri tano.”

¹³⁶ Marta lontsongo u te, “Makwerhu wa mina u file. U etlele esirheni. U borile; u le ku nun’hwensi. Hosi, loko ngi a Wu ri kona, makwerhu wa mina ingi a nga fanga. Kambe hambi kuri sweswi, hinkwaswo leswi U swi kombelaka Xikwembu, Xikwembu xi ta Ku nyika swona.” Oho, mina!

¹³⁷ A ku, “Hi mina ku pfuka na Vutomi. Loyer a pfumelaka eka Mina, hambi a file, u ta hanya. Un’wana na un’wana loyi a hanyaka a va a pfumela eka Mina, a ngaka a nga fi. Wa swi pfumela leswi xana?”

¹³⁸ A ku, “Ina, Hosi. A ndzi koti ku swi hlamusela, kambe ndza swi pfumela. Ndza pfumela leswaku hi Wena Kreste loyi a faneleke ku ta emisaveni. Ndza pfumela, hi Matsalwa lawa ya tivekaka swinene, leswaku U fikelela swilaveko swa Sweswo.”

¹³⁹ A ku, “Mi n’wi veke kwihi?” Oho, mina! Swin’wana swi faneleku humelela. Mavhiliwa hinkwawo ya le ku hlengeletaneni kun’we hi nkarhi wa kahle. Wa vona?

¹⁴⁰ U yile esirheni. Bibele yiri, “A ngari na ku saseka loku ku nga kokaka mahlo ya hina eka Yena.” Kumbexani a ri lontsongo, Nakulorhi wa makatla yo voyama, a yimile na

makatla lamantsongo ya voyamerile ehansi, a karhele na ku hlakala hi ku famba.

A ku, “Lazaro, humela handle!” Kutani wanuna loyi a file, mune wa masiku, a yima hi milenge ya yena.

¹⁴¹ Wansati wa Mukreste wa xisayense. Ndzi khomeli loko ndzi vavisa matitwele ya wena; a ndzi endleli swona. Wansati wa Mukreste wa Sayense, ku suka ekerekeni ya leyi, u hlanganile na mina siku rin’wana le handle. Kutani a ku, “Nkul. Branham,” a ku, “ndzi rhandza machumayelelo ya wena, kambe ku na nchumu wun’we lowu u wu endlaka ngopfu!”

Ndzi ku, “Hi wihi wona?”

A ku, “U tidzunisa ngopfu hi Yesu.”

¹⁴² Ndzi ku, “Ndza tshembha leswaku sweswo hi leswi A nga na swona hinkwaswo ku lwisana na mina.” Wa vona? Wa vona? Wa vona?

¹⁴³ A ku, “U N’wi endla loyi a nga na Vukwembu.” Wa vona, a va pfumeli leswaku A ri na Vukwembu. Va pfumela leswaku A ri munhu wa ntolovelu, mudyondzisi wa kahle, mutivi wa vuehleketi. A ku, “U N’wi endla loyi a nga na Vukwembu. Kambe A ngari na Vukwembu.”

¹⁴⁴ Ndzi ku, “Oho, ina, A ri na byona.”

A ku, “Loko ndzi nga swi khorwisa eka wena, hi Bibele ya wena n’winyi, leswaku A nga na Vukwembu, u ta swi pfumela xana?”

¹⁴⁵ Ndzi ku, “Bibele ya mina yi vula tano, ndzi—ndzi pfumela Rito. Sweswo hi Leswi A nga swona.”

Kutani a ku, “Eka Mukwetsimi Yohana, ku avanyisa ka vu11, loko Yesu a tava a yile esirheni ra Lazaro, Bibele yi ri U ririle.”

Ndzi ku, “Xana sweswo swi nghena kwihi eka swona?”

A ku, “Hi swona, sweswo swi kombisa leswaku A ngari na Vukwembu.”

¹⁴⁶ Ndzi ku, “Ntsena u tsandzeka ku vona leswaku Wanuna loyi a ri Mani. A ri Xikwembu na munhu havumbirhi. Na swona tani hi munhu, a rila, loko A ri karhi a rilela gome ra vona. Kambe loko A yima a ku, ‘Lazaro, humela handle,’ kutani wanuna loyi a file, mune wa masiku, a yima hi milenge ya yena nakambe, yaloye a tlula munhu.” Ina, nkulukumba! Ina, hakunene!

¹⁴⁷ Nakona hi minkarhi yotala ndzi virile mavonelo, loko A enhla entshaveni vusiku byebyo, a khomiwile hi ndlala, A ri munhu. A twa ndlala hi mixo lowu landzelaka. A ri munhu. Kambe loko A tava a tekile swinkwa swimbirhi na tihlampfi ta ntlhanu, ivi a phamela ntlhanu wa magidi, a teka swirhundzu swa nkombo, yaloye a tlula munhu. Ina, nkulukumba. A ri munhu, exihambanweni, loko A rila, “Xikwembu xa Nga, U Ndzi tshikele yini xana?” Loko A rila, “Ndzi nyikeni mati,” ivi

va N'wi nyika ntsuvi na nyonghwa, A ri munhu, loyi a rilaka. Kambe hi mixo wa Paseka, loko A tshovile xilemo xin'wana na xin'wana xa rifu, tihele, na sirha, kutani a pfuka, A tlula munhu.

¹⁴⁸ A ri munhu hi vusiku byebyo, a etlele endzhaku ka byatso lebyintsongo laha A ri kona le handle na vadyondzisiwa, ivi khume ra magidi ya madimona ya lwandle ya hlambanya leswaku ya ta N'wi nwerisa. Ahaa. Le handle exikepeni lexintsongo xa khale, kukotisa xipfalo xa bodlela le handle, kukotisa sweswo; A karhele swinene, a swi kalanga swi N'wi pfuxa. A ri munhu loko A ha etlele. Kambe loko A tlhandleka nenge wa Yena ekhumbhini ra byatso, kutani a languta ehenhla ivi a ku, "Miyela, u ku ntse," kutani mheho na magandlati swi N'wi yingisa, yaloye a tlula munhu. A ri Xikwembu!

A swi hlamarisi loko muphati a te:

Eku hanyeni, U ndzi rhandzile; eku feni, U ndzi ponisile;
 Eku lahliweni, U rhwele swidyoho swa mina swi ya ekule;
 Eku pfukeni, U lulamisile mahala hilaha ku nga heriki;
 Siku rin'wana U le ku vuyeni, O siku ro kwetsima!

¹⁴⁹ Ina, nkulukumba! Hundza emuxaxeni. A ndzi na mhaka leswaku swi koxa yini.

Xihambano lexi xi kwetsimisiweke ndzi ta xi rhwala
 Kukondza rifu ri ndzi ntshuxa;
 Kutani ndzi ya eKaya, ku ya ambala harhi,
 Hikuva ku na hari ya mina.

¹⁵⁰ Hi ku pfala, ndzi ta vula leswi. A ndzi ri eku hlayeni ka xitori nkarhi wun'wana lowu nga hundza, hi muavanyisi. A ri wanuna wo lulama, wanuna wa kahle, a rhandziwa. Nakona a kuri na ntlawa wa vanhu edorobeni lava a va ehleketa leswaku va nga tshikiwa va hundza eka swin'wana na swin'wana, swingaleswi, a va ri na swotala, swingaleswi va pfurile yindlu ya ndhuma yo biha, va fambisa xitolo xa byalwa, byalwa, hinkwaswo swo fana na sweswo. A swi ngari enawini. Kutani va kumiwile hi nawu, wanuna wa mfumo wa nhlanganelo, nakona va yisiwile ekhoto. Kute loko vanhu hinkwavo va doroba, doroba lerintsongo vahlengeletanile, a va swi tiva leswaku wanuna loyi a endlile swilo swotala kwalahaya, wanuna loyi a fambisa ndhawu liya ya ndhuma yo biha. Kutani va—va, ntlawa wo ahlula, wu vonile wanuna nandzu, hikuva u kumiwile a ri karhi a swi endla. Kutani muavanyisi u n'wi vonile nandzu, kutani a n'wi gweva malembe yotala, ehandle ka papila ra ntwanano wa swa nawu, ehandle ka xikombelo xo hundziseriwa emahlweni, kumbe u n'wi rhumerile swin'wana, hikuva sweswo hi leswi nawu a wu vula swona.

¹⁵¹ Vanhu lava a vari ehandle ka khoto va n'wi hlongorisile, kutani va ku, "Wa swi tiva ku i yini? Munhu un'wana na un'wana laha edorobeni u ta ku venga!" Va ku, "Va ku vengela ku endla xiboho xexo ehenhla ka wanuna luya." A vari vagembuli hinkwavo, vona hi vox. Kutani va ku, "Hi—hi ta ku venga hinkwerhu ka hina. Hi ngaka hi nga ha ku hlawuli nakambe. Ku ngaka ku ngavi na un'we wa hina loyi a nga ta ku vhothela," va n'wi buwa loko a ri karhi a rhelela hi xitarata.

¹⁵² U yimile nyana xinkadyana, a ku, "Mi nge ndzi vula swin'wana." A ku, "Ndzi endlile leswi nga ntirho wa mina. Wanuna luya a ri na nandzu, swi ngari na mhaka leswaku hi yena mani. Nakona a ndzi fanele ku n'wi gweva hi kuya hi nawu lowu ndzi hlambanyeke ku wu hlayisa."

A ku, "Wa vengiwa edorobeni leri!"

¹⁵³ A ku, "Kambe ndzi rhandziwa swinene ekaya, hi vanhu va ka hina."

¹⁵⁴ Hi ngava hi ehleketa nchumu lowu fanaka, loko mi nga ndzi khomela hi ku vula sweswo. Ndzi yimerile leswi ndzi poniseriweke ku swi endla, ku tlakusa Rito leri ra Xikwembu. Ndza swi tiva leswaku tidinominexini ta ndzi venga hikwalaho ka swilo leswi ndzi swi vulaka, kambe ndzi rhandziwa swinene ngopfu eNdlwini ya Xona, exikarhi ka vanhu va Xona.

A hi khongeleni.

¹⁵⁵ Hosi Yesu, hi ngava hi ri karhi hi vengiwa hi misava, kambe hi rhandziwa hi Tatana. Hi pfune, Xikwembu lexi rhandzekaka. Pfuna vanhu lava, leswaku un'wana na un'wana wa vona, Hosi, leswaku minkateko ya Wena yi wisela ehenhla ka vona. Hi pfumeleli ku ya ehandle ka muxaxa sweswi. Hi pfumeleli ku ya ehandle ka maehleketelelo ya hina vinyi. Hi pfumeleli ku famba hi maehleketelelo ya Xikwembu. Na swona Bibele yi vurile leswi, "Mi va ni ku anakanya loku ngi a kuri ka Kreste." Swingaleswi a hi ehleketeni miankanyo ya Yena, ku ngari mianakanyo ya hina vinyi, hikuva nkarhi wotala ha hoxisa. Swingaleswi, ku tiyisisa, a hi pfumeleli mianakanyo ya Yena yi wisela eka hina. Kutani mianakanyo ya Yena a kuri ku endla ku rhandza ka Tatana, na swona ku rhandza ka Tatana i Rito ra Yena leri nga tshembhisawa.

¹⁵⁶ Hi pfumeleli ku ya ehandle ka muxaxa, vusiku lebyi, Hosi, kutani hi ya kuma Yesu. Hi ngaka hi nga N'wi kumi hi ku joyina kereke. Hi ngaka hi nga N'wi kumi hi ku qhavulana mavoko na muministara un'wana, kumbe—kumbe ku sayina mukhuva wokarhi wa kereke, kumbe nchumu wun'wana lowu hi wu tshembhisaka, ku ya exikolweni xa Sonto masiku yo tala swonghasi elembeni, na swin'wana. Hi ta N'wi kuma ntsena eRitweni, hikuva hi Yena Rito.

¹⁵⁷ Kutani loko hi ri karhi hi vona siku leri ri tshembhisiwile, leswaku U tava ehandle ka muxaxa, a humeseriwile ehandle

nakambe; sweswi hi pfumeleli ku ya ehandle ka muxaxa, hi lunghekerile ku rhwala tingana ta Yena; hi vengiwa hi misava leyi, kambe hi rhandza hi Loyi A hi rhambike eMuxaxeni. Hi nyilke swona, Hosi.

¹⁵⁸ Loko kuri na lava va nga N'wi tiviki lahawani, nakona va nga si tshama va ya ehandle ka muxaxa wa ku nghena kereke yokarhi, hambi swiri tano u tivula Mukreste. Kambe loko u ku, "Swilo leswi, ndzi pfumela ku, i swa siku rin'wana," sweswo swi kombisa leswaku ku ngaka ku ngavi Moya lowo Kwetsima.

Swi nga endlekisa ku yini kuva wanuna loyi a tatiweke hi Moya lowo Kwetsima a kala a khuvuriwa hi vito ra "Tatana, N'wana, Moya lowo Kwetsima"? Loko, Paul, muapostola lonkulu, a te, "Loko Ntsumi yi ta hi le Tilweni . . ." Mi ngava mi swi endlile, nkarhi wun'wana, mi nga tivi ku hambana na swintsongo. Vanhu lavaya va swi endlile, va ngari ku tiveni ka ku hambana, eka Mintirho 19. Kambe a ku, "Ntsumi loko yi dyondzisa swin'wana leswi hambaneke, a yi rhukaniwe."

Xana mi nga wu amukerisa ku yini mukhuva ya kereke, kumbe vuism byo karhi, nchumu wun'wanyana, loko Bibele yi te, "Xitsembhiso xi le ka n'wina," nchumu lowu fanaka, "nkhuvulo wa xiviri wa Moya lowo Kwetsima"?

¹⁵⁹ Swi nga endlekisa ku yini kuva Moya lowo Kwetsima, lowu tsaleke Rito, wu va endzeni ka n'wina, wu ri karhi wu kaneta Rito? Xana Wu nga kanetisa ku yini, loko Moya lowo Kwetsima hi Woxe wu te, "Loko munhu a nga engetela rito rin'we eka Leri, kumbe ku hunguta swin'wana na swin'wana eka Rona, Ndzi ta susa xiave xa yena eBukwini ya Vutomi"? Xana Moya lowo Kwetsima wu nga hungutisa ku yini swin'wana eRitweni, kumbe ku engetela swin'wana eRitweni?

¹⁶⁰ Munghana wa mina, havumbirhi loyi a nga lahawani na loyi a nga amisaveni leyi nga vonakiki laha thepi leyi yi nga taya kona, laha ku nga vonakiki eka hina sweswi, pfumelela sweswo swi nghenelela emakorhwени ya mbilu ya wena ku suka eHungwini ra mixo lowu eku dyondziseni, ku vona laha hi nga kona. Loko u nga se tshama u teka xileriso lexi ndzi nga vulavula hi xona ku ngari khale ngopfu, xana a wu nga xi amukeli xana? Hi lahawani ku ta endla hinkwaswo leswi hi nga ta swi kota eka wena, ku ku pfuna.

¹⁶¹ Ndzi mbhoni ntsena. Ndzi mugangiseri wa tivhothi ntsena. Tani hilaha hi nga na vona eLouisville sweswi, e—e Democrat Convention of Kentucky, e . . . Va le ku akeni ka platifomo ya leswaku munhu wa vona a ta hlawuriwa. Na minavu ndzi le ku akeni ka platifomo ya Hosi ya mina. A mi nga N'wi amukeli, vusiku lebyi, tani hi wa n'wina vinyi?

¹⁶² Loko ha ha korhamisile tinhloko ta hina, na timbilu ta hina, na tonavu, hi nkarhi lowu, xana mi nga yimisa mavoko ya n'wina kutani mi byela Xikwembu. Ku ngari eka mina; ndzo va munhu

ntsena. Yimiselani mavoko ya n'wina eka Xikwembu, mi ku, "Xikwembu, ndzi tweli vusiwana. Hi ntiyiso ndzi lava swilo hinkwaswo leswi ndzi nga swi twa. Ndzi lava ku ya ehandle ka muxaxa. A ndzi na mhaka leswaku munhu un'wana u ri yini." Xikwembu xi mi katekisa. Mina, emavokweni, emavokweni! "Ndzi lava ku famba ndzi nga ri na muxaxa. Swi ngari na mhaka leswaku swi ndzi durhela yini, ndzi ta teka xihambano xa mina ivi ndzi xi rhwala masiku hinkwawo. Ndzi ta ya ehandle ka muxaxa. Swi ngari na mhaka leswaku vanhu va vula yini hi mina, ndzi lava ku N'wi landzela ehandle ka muxaxa. Ndzi lunghekerile ku famba."

¹⁶³ Tatana wa le Tilweni, U ya vonile mavoko lawaya. Kumbexana dzana ra vanhu, kumbe ku tlula, emuakwini, va yimisile mavoko ya bona. Hosi, ku na Xin'wana ekusuhi na bona sweswi, Munhu un'wana, Munhu wa Kreste, loyi a nga vonakiki eka tihlo ra ntumbuluko, na swona u va endlile leswaku va teka xiboho. Evuton'wini bya bona vinyi, va swi tiva loko va ri karhi va languta exivonini, va swi bona leswaku ku na nchumu lowu kayivelaka. Nakona va lava leswaku vutomi bya bona byi vumbeka hi ku ya hi xitsembhiso xa Xikwembu, kutani va yimisile mavoko ya bona hi ku tsembheka loku ku enteke. Va pfuni, Hosi, ku ya enyangweni lowukulu vusiku lebyi, ku ya exivaleni xa tinyimpfu. Ingaku va nga nghena hi ku olova na ku titsongahata. Hi nyike swona. I va Wena, Hosi. Tirhana na bona.

¹⁶⁴ Sweswi, a va tava va nga xi tekanga xiboho xexo, a va tava va nga yimisanga mavoko ya bona, handle ka nchumu wun'wana lowu nga ehenhla ka ntumbuluko. Swi komba leswaku ku na vutomi kun'wana lahaya. Hikuva, hi ku ya hi sayense, giravhithexini a yi ta yisa mavoko ya hina ehansi. Kambe ku vile na nchumu lowu beke mieleketo ya bona, lowu wu va endleke leswaku va elela milawu ya giravhithexini ivi va yimisa mavoko ya bona ya kongoma eka Mutumbuluxi loyi a va tiseke. "Ina, ndzi lava ku famba ndlela hinkwayo. Ndzi lava ku ya ehandle ka muxaxa, vusiku lebyi."

¹⁶⁵ Hosi, xidziva xi lulamerile goza ro sungula endzhaku ka ku hundzuka, kutani ku ta ku khuvuriwa, na xitsembhiso xa ku amukela Moya lowo Kwetsima. Emasikwini lawa ya makumu, ku vitanelia endzhaku eka Ripfumelo ra xiviri, xileriso xa xiviri! Hi bona vanhu votala swinene vari ekule na Kreste, va ri karhi va fa ehansi ka swileriso leswin'wana leswi endliweke hi munhu. Va ngava vari kahle swonghasi eka tidinominexini ta bona, kambe, Hosi, ndzi—ndzi lava xileriso xa Wena.

Hi Wena Dokodela ra hina. U kona Dokodela. Wu kona murhi eGilead. Yi kona N'anga lahwani, vusiku lebyi, ku ta horisa moya wun'wana na wun'wana lowu vabyaka xidyoho, ku ta horisa munhu un'wana na un'wana wa xinyama. Dokodela lonkulu wa minkarhi hinkwayo, Mutumbuluxi lonkulu wa

matilo na misava, tana sweswi, U ta ta xana, exikarhi ka hina, u ta vulavula na hina. Hi Vito ra Yesu Kreste.

¹⁶⁶ Loko un'wana na un'wana a ha khongelela embilwini ya yena, "Hosi Yesu, ndzi pfuni sweswi!" Kutani loko kuruku a wu se tshama u khuvuriwa, nakona u khorwisiwile... A ndzi chumayelanga hi nkhuvulo. Kambe wa kholwa leswaku u fanele ku khuvuriwa hi nkhuvulo wa Xikreste, ndlela yin'we ntsena leyi Mukreste un'wana na un'wana...

¹⁶⁷ Swi to yini loko mi ngaya ehenhla Lahaya, mi khuvuriwile hi ndlela yin'wana, ivi Yesu yaluya A nge te, "Loyi a nga ta hunguta Rito rin'we, kumbe ku engetela rito rin'we, leswi fanaka swi ta susiwa eka xiave xa yena xa Buku ya Vutomi"? Yesu u virile sweswo. Na swona U te, "Matsalwa hinkwawo ma huhutiwile nakona ma fanele ku hetiseka." Sweswi mi tiva ku hambana. Xana mi ta endla yini hi swona?

¹⁶⁸ Loko kuruku u vile na vutitwi ntsena kumbe swin'wana! Ndza pfumela eka vutitwi. Loko kuruku u cinile ntsena u ri eMoyeni, u vulavurile hi tindzimi! Ndza pfumela eka sweswo, na swonavu. Kambe loko kuruku sweswo hi swona ntsena swa le kule, kutani moya lowu nga endzeni ka wena wu ku byela kuva u nga landzeleli Rito loko u ri karhi u swi tiva leswaku Ri lulamile, ku na swin'wana swi nga hoxeka hi moya walowo. A hi Moya lowo Kwetsima. Wu ngaka wu ngavi wona. Wa vona, a Wu ta tivisa Rito ra Wona N'winyi. Ma swi tiva sweswo. U nga tilulamisela ku ta sweswi loko hi ri karhi hi khongela.

¹⁶⁹ Yesu wa Nazareta, tana ekusuhi sweswi kutani u vulavula na mbilu yin'wana na yin'wana. Ndzi va nyiketa eka Wena. Ingaku va ngava... Mavoko lawa hinkwawo, i tithirofi ta Hungu, Hosi, ku suka eka Wena, na vukona bya Wena lebyikulu bya Mhawuri lebyi nga na hina sweswi. Munhu un'wana na un'wana loyi a kotaka ku twa Moya a nga vula leswaku U na hina sweswi, matitwelo lamakulu ya vukwetsimi. Hi nyike swona, Hosi, kona sweswi, hi Vito ra Yesu Kreste.

Sweswi loko ha ha korhamisile tinhloko ta hina.

¹⁷⁰ Loko kuri na vavanuna lahwani lava va nga lavaka ku khuvuriwa hi Vito ra Yesu Kreste, va lavaka ku hundzuka, va lava nkhuvulo wa Moya, ku na kamara leyi nga pfuleka eximatsini xa mina; vavasati, exineneni. Ku tava na un'wana kwalahaya loyi a nga ta mi letela. Ku na tinguvu to khuvula hi tona leti rindzeleke, hinkwaswo.

¹⁷¹ Sweswi, loko ha ha korhamisile tinhloko ta hina, hi ri karhi hi yimbelela. "Ndzi twa wa mina..." Hi ta hlangana na n'wina.



KU YA EHANDLE KA MUXAXA TSO64-0719E
(Going Beyond The Camp)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni madyambu, Mawuwani 19, 1964, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org